

摘藻堂四庫全書薈要

集部

欽定四庫全書會要

集部

漢魏六朝百三家集卷八十四

欽定四庫全書薈要卷一萬九千六百七十五

集部

漢魏六朝百三家集卷八十四

明 張溥 輯

梁元帝集

賦

玄覽賦

歲次旃蒙月建司空變凌陰之呂扇廣莫之風蕭子褰
帷九水作牧三宮乃盱衡而言曰惟天為大惟堯則之

惟地蓋厚惟王國之粵我皇之握鏡實乃神而乃聖陳
六聯於八則弘九職於三令運璇樞而御宇執玉衡而
齊政大矣廣矣無德而稱俯齟齬於軒義諒斗筭於子
姒包河圖與洛書括龍官乎鳳紀超大德於百王高鴻
名於萬祀惟天縱於副后踰啓誦而惟首既倫儒於肅
成復斷獄於長壽豈止丕莊屈膝將令班鄭捧笏譬衢
樽而待酌若懸鐘之須扣前踰繫象之外聲高洙泗之
右伊俯已之顓愚謬聯萼於天衢筮東門而畫野創南

國而分墟詔伯宗以為儐誥內史而策書用分茲於茅
社從侯服而俾予類金獸以封建非桐珪以錫處爾其
湘水之東即我龜蒙魏甘露而分邑吳太平而定中鎮
麟山之崔嵬傍龍跡其穹窿金城高而相屬石燕起而
依風豈連鑣於分陝羨追縱於二公彼琅臺之作守有
彭泗之嘉名殊竝海之分地異魚石之所城經沈子之
高壩蓋水運之堤封謝禮樂之千櫓閱武騎之朝衝軼
錦車而前驚驅魚軒而繼蹤無復鸞歌鳳舞唯對綠柳

青松留吳宮之宿鶯響平陵之夜鐘飛余轡而西征戍
太真之舊營鳴節鼓之金鐏屯戎車於石城戮滔天之
封豕斬橫海之長鯨每輟書而歎息景樹德之風聲從
王役於鏡中浮文鷁而載鴻經謝亭而帳飲想彥伯之
高風度五城而騁望見三冀之無窮故以飛雲蒼隼白
鱧青桐金吾舍利鳴鶴紫宮眺方嶽乎雲間望赤坂之
朱殷想真長之送別懷思曠之還山此檜楫而方遠彼
松舟而未閑倦旅泊於新丘同渭水之不流或千人而

竝唱乍萬人之相鉤毀橋由於瑗度鑿空資於仲謀睇
三茅之靈秘懷九轉之仙記紫臺石室之文青首銀函
之字獨有披霧之心彌軫凌雲之志捫殷碑之愴望挹
延州之高讓井甃沸而蜚螭勢崎嶇而低昂見傳巴之
度曲開安歌之浩唱想觀樂乎朝陽憶紆衣乎夕張迴
余舲之美風聳余棹乎雲陽彼桑梓之必敬況粉榆之
舊鄉將遊目於五湖乃浩覽於姑蘇臨閭門之跨水聳
重闕而開都睇太伯之卜祀爰避國於勾吳去西滸之

樂政尊東夷之楷模時渡谷水之陽尚想嘉禾之方壯
慶亭於吳后雄構李於越王觀泉亭之涌波崖巍巍而
峩峩張素蓋而縈洲嶼馳白馬而越江沲鼓洪濤於萬
里曾未動於纖羅及戾止乎東甌登玉筍與銅牛山東
武而遙集鴈南海而飛浮巖亭亭其似蓋氣苔苔其若
樓登舜橋而延首瞰禹井而淹留御史之狀猶在督護
之門不修雖濫同於借寇愧人虞之何求皇覽揆余之
忠誠詔入謁於承明既攝州於淮海且作尹乎中京慕

張生之擿伏挹邊延之勵精珥金貂而待問鳴玉佩而
趨庭兼三河及三輔惣九緯乎九經揚王庭之後選聞
袞然於前則時濫假於中台掌邦教之觀國乍南宮而
薦士且右鄉而表德判辟雍之樂語辨金馬之儒墨驅
安居以騁望壯天居之麗極詳夫皇王爰處本無定所
堯都平陽舜在冀方玄王居亳成周卜洛故知黃旗紫
蓋域中為天地之所合風雨之所會蔭美氣之葱葱浮
卿雲之靄靄聳梁山而成闕紫長淮而似帶昔者甘泉

暉章平樂未央凌霄飛雨麒麟鳳凰九華仁壽百福明
光玉階紫闥雕柱錦牆木蘭為棟文杏為梁溫臺冬煥
秋窓夏涼甲乙之帳庚辛之方未有祗園之右齊之仁
壽用擬舟航長為稱首日殿月宮金池珠叢七重迢迢
千柱玲瓏虹橋左跨鴈苑南通紫紺之堂臨水青蓮之
臺帶風及夫暎光未旭更籌曙促猶然陽燧之火尚執
驪龍之燭或帶桃花之綬乍響玄山之玉爰八命而建
旗誠非親而勿居應鳴鞞於龍角覆緹幕於熊車開轅

門於淮渚泛舩皇之容與吟紫騮之長歌奏玄雲之疊
鼓開右座而納文設左廣而設武既風起而雲飛復摧
班而拉虎泛樓船而鬱紆憶霸楚之雄圖悲騅馬之不
逝忘逐鹿之長驅豈烏江之天險資赤帝之神符於是
途經灌壘水分當利彼吳王之連和延魏后之交質趙
將軍之建節辛侍中之奉使亮鼎足其何言限修江而
為二泊九井而問津蓋六服之都會方函谷之設險譬
魯陽之襟帶觀棄繻之裂帛見高車之輔軼顧濡須之

故嶽每當食而忘飯鬪二虎於江干爭兩龍於修坂既
凱捷而來旋遂鳴鏡而獨返彼銅山之可傷何驕容之
無方已築長洲之苑復實海陵之倉遂稱兵而內侮宜
朝起而夕亡原西陵以肇基始衝梯於士治載為前茅
之首實表勤王之師同薏苡之興謗成貝錦之深疑良
弓藏而高鳥盡入不謙而出不辭遊雷中而徜徉遇日
吉而辰良祀公瑾以桂酒薦忠肅以椒漿實討曹之英
策蓋謀桓之秘方衣披披而屢舞神欣欣而樂康弔劉

安於下雉聊載懷於惇史或策杖而龍飛或叱石而羊
起將雞鳴於天上遂埋魂於蒿里匪仙道之云偽蓋為
仁其由已經釣臺而高邁過鄂渚而西浮變青門之三
襲為黃塵之一丘城逶迤而中斷階坂阨而半留分沙
羨而啓鎮即開蕃於夏州星尚連於翼軫舍兼分於斗
牛麗滄浪之水清良信美乎濯纓嗟其釣而非釣復何
慮而何營羌有願而不獲拂蘭橈而上征冬已謝而春
辭聊方舟而水嬉看白沙而似雪望却月而成眉臨石

渚其如鏡玩弱柳其猶絲停赤壁而延佇聊愴望而方
思吳水鄉之舟楫魏陸產之臯貌本吳長而魏短況地
利與天時結憤風而炎上燎原火於驚颶灰霧霏而擊
馬箭參差而麗龜成班車之逸氣碎當途於鹿麋分洞
庭於吳上限東益於巴丘如溜澠之相別似涇渭之分
流雖滔滔而直瀉終耿耿而橫浮想蘭香之薦枕懷娥
皇之夜遊若夫子瑜設險之記閻遨游泳之地既下車
而踐境早詢求於方志曉泊嚮拳之津夕瞻荒谷之寺

居柳下而布德坐棠陰而高視班六條於宰邑賢十部
於從事每題輿於仲舉豈虛名乎叔治藉務隙於登臨
乃紛吾之本志時復設羽蓋揚旌旆乘雕玉從貝帶浮
雲起登高唐泛枉渚望涪陽荆棘生於龍門之下狐兔
穴於馬牧之旁臨章華而流盼見舊楚之悽涼試極目
乎千里何春心之可傷其舊渚宮也夾江帶阡布護井
田通達交道高門接連人要水心之劒家有給耕之田
既追隨而得性實燕處而超然若平臺之中觀閣相通

雄梁渡水壯翼臨空金堤之路銅鞮之宮閣寫凌霄樓
布麗譙橫走馬而為觀擬牽牛而作橋爾乃樹之榛栗
椅桐梓漆三色黃甘千戶朱橘桃蔭井而成蹊萍浮江
而泛實蟬鳴枝而候稻范飛冠而吐蜜復有水底石髮
山筋地骨書帶新抽屏風互發反魂長生靈壽女貞金
鹽玉豉堯韭舜榮交讓之目代謝之名忘憂長樂枇杷
鼓箏竹則篴簫綠箴交戰策皮淚沾虞后龍還葛陂便
娟防露檀欒夾池聊右書而左琴且繼踵於華陰彼門

人之問道各家求而有心先鉛槧於魚魯乃紛定於陶
陰識三家之云謬知五門之可尋時仰稟於皇猷計已
濮於裨僚乃稜威於華墨出車檻之云修觀月窟之入
附覩日勒之來遊既虎牙而成號又龍額而為侯仰皇
德之供深疑朱離於侏任見白題之蹋鼓看烏孫之學
琴獻桂條之良賁奉桃枝之恠琛嗤聚米於馬援哂畫
地於臧旻彼蠢爾之為鯁伊憑陵而未靜異黃巾於黑
山非綠林於青嶺余喟然以指蹤實濟寬而持猛負步

光之文劔驚漢陽之夕景麾靈琚之左轉光玳簪而右
簪白雲生而陣合紅塵起而軍暗於是驅驕驕命蹶張
迴翠蓋之金瓜臨絳宮之玉堂擬都護之戊己模荆尸
之甲裳作齊軍之滅竈數燕師之卧牆觀田畯於虞澤
命車右而前驅猶從戎於細柳若驅馬於長榆矜猿鳴
之抱木傷兔走之依株每愀然而作色方載馳而轉軾
閱放麋而興憫對亂鱗而動惻矧高宴於城隅駐五馬
而踟躕乃有青琴碧玉絳樹綠珠西河王豹東野綿駒

蘭缸夕然合璧斜天照流風之迴雪映出水之初蓮非
吾心之所悅曾未始而流連濫叨榮於分陝踰一紀之
星躔子既生而冠字嗟留滯以迴遄罷臨邊之瑞節觀
楚黎之卧轍向秋野之蒼茫對寒江之幽咽散歸雲之
鬱蓊吐長風之颼颼聞羌笛之哀怨聽胡笳之淒切慘
余袂兮淚成行攀余轅兮不忍別奉信珪而入朝驅馬
馬而乘輅既總司於戎旅亦兼飾於豐貂登輦踞而目
極忽平原之已超帶方遠之九軌接馳道之三條彼重

門之擊柝馮霞起以建標雜丹樓以藻井間青山於綺
寮瞰落星之從龍覩燿火之迢遶鬱如蓬萊之臨滄海
憬如崑崙之出絳霄函夏之所覲江漢之所朝若夫天
不愛道地不愛寶賓連紫達華平朱草麒麟五色飛兔
雙翼集我君圃之旁遊我帝梧之側于斯時也天子郊
禘于圓丘高玉簡於東漢邁金版於西周奏蒼璧而服
大裘樂有雲翹之舞牲非蠶粟之牛設黃琮而禮地望
方澤乎神州節會咸池之瑄冕無繁露之旒觀三農乎

九穀薦黍稷之種稊命甸師而清塵詔封人而出宿敬
青壇而致虞動翠耜而祈穀時季春之上巳臨祓禊乎
沼沚杏花發於露寒棘實浮於濛汜爰長久之御節採
日精於山趾天策夜而動星鈎陳朝而按軌于是時也
陪玉軼飾金羈驅騶駟躍翠羆乘倜儻控權奇寶劒昭
晰綵鞞陸離乍俯馬足時仰月支見靈烏之占巽觀司
南之候離習執鞭而珥筆雖日夕而忘疲奧重明堂地
景已乎正陽乃八牕而四達開上圓而下方置陰鑒之

分影爐銜光而共香若乃羽族徘徊察風應雷鴛鴦感
夢乾鵲知來露華挾鷗而肅侶銜環帶壘而含猜孔接
影而颺颺鵲交頸而毳毳爾其彭蠡際天用長百川沸
渭渝溢湫淡連延大則浩汗滉漾細則澆灌潺湲遇神
颺之弗爽彼所報之無愆且搏搖以九萬乍高颺而三
千其中則有灩澦嘉魚驚羽龍鬚戴星含石蒲身雉軀
乍浮圓鏡時泛明珠報蕩子之長信送仙人之短書恥
觀魚而為樂解舒鴈於高繳必冀孔愉之龜當如噲參

之鶴懷衝冠而發憤嗟吾人之施薄觀進退於我生每
篤靖而居貞羞為金谷之富不矯石閭之清每鞠躬而
遵節藉王道之既平貴靜者人所便予得之於自然非
三百之不足惜五十於豐年笑汗斜之行潦喜甘雨於
石田飛新梅於倡粉拂輕絮於房綿月芝抽而曉落燈
花開而夜燃菊從風而金散荷帶水而珠圓已寤歌於
折柳復行吟而採蓮課七分與六日推兩地於參天夕
章程而鈎股亦剡注而參連幼墳籍以自娛迄方今而

不渝雲氣芝英之簡懸針倒薤之書緘乎蒸栗之帙飾
乎酸棗之珠擬河獻之留真希淳儒之席珍笑彭聃之
下士聊重義而自欣鑿戶牖而長望混木鴈而兼陳嗟
今來而古往方絕筆於獲麟

言志賦

天文既表人文可觀知負宸之未易信握鏡之云難差
立極而補天驗璧合而珠連有庖羲之八索稱朱襄之
五絃聞夏王之鑄鼎重農皇之播田雖車軌之未同亶

彌媿於棟隆戮封豕於海內斬長狄於區中懷宿昔之
璵璠竝來遊於菟園悲元瑜之已逝歎靈光之獨存想
延賓之北閣因寘酒於南軒聞鶯鳴而懷友聽長笛其
何言夙有尚於清靜叨再入於鄢郢東窺文命之穴南
望鴻崖之井遂撫運而登庸謬垂旒而卷領雖有愧於
前英每求衣於未明召司烜而照夜觀執珪而滿庭誠
雖休以勿休實旨酒之忘憂絕何楊之妙舞廢綿駒之
善謳彼知止與知足復何營而何欲柱何用於黃金案

寧勞於青玉爾乃高步北園用蕩囂煩桂偃蹇而臨棟
石穹隆而架門對灌木之修聳觀激水之飛奔澗不風
而自響天無雲而晝昏聞賓鴻之夜飛想過沛而霑衣
況登樓而作賦望淮海而思歸

春賦

洛陽小苑之西長安大道之東苔染池而盡綠桃含山
而併紅露霑枝而重葉網縈花而曳風

秋興賦

秋何興而不盡興何秋而不傷傷二情之本背更同來
而匪方復有登山望別臨水送歸洞庭之葉初下塞外
之草前衰攸征人與行子必承臉而沾衣紛吾閑居有
怡優游多暇乃息書幌之勞以命北園之駕爾乃從玩
池曲遷坐林間淹留而蔭丹岫徘徊而褰木蘭為興未
已升彼懸崖臨風長想馮高俯窺察游魚之息澗憐驚
禽之換技聽夜籤之響殿聞懸魚之扣扉將據梧於芳
杜欲連留而不歸

臨秋賦

火歇兮秋氣生風起兮秋潦清覽時興而自得聊飛轡
而娛情遵二條之廣路背九仞之高城爾乃登長坂息
余驥攬筆抒情沈吟屬思草色雜而香同樹影齊而花
異遙峰迢遞縈沙斷絕雲出山而相似水含天而難別

對燭賦

月似金波初映空雲如玉葉半從風恨九重兮夕掩怨
三秋兮不同爾乃傳芳醪揚清曲長袖留賓待華燭燭

燼落燭華明花抽珠漸落珠懸花更生風來香轉散風
度焰還輕本知龍燭應無偶復訝魚燈有舊名燭火燈
光一雙炷詎照誰人兩處情

採蓮賦

紫莖兮文波紅蓮兮芰荷綠房兮翠蓋素實兮黃螺於
時妖童媛女蕩舟心許鷁首徐迴兼傳羽杯棹將移而
藻挂船欲動而萍開爾其纖腰束素遷延顧步夏始春
餘葉嫩花初恐沾裳而淺笑畏傾船而斂裾故以水濺

蘭橈蘆侵羅襦菊澤未反梧臺迥見符濕霑衫菱長繞
釧泛柏舟而容與歌採蓮於江渚歌曰碧玉小家女來
嫁汝南王蓮花亂臉色荷葉雜衣香因持薦君子願襲
芙蓉裳

鴛鴦賦

青田之鶴晝夜俱飛日南之鴈從來共歸雙飛今不息
自憐兮何極一別兮經年相去兮幾千雄飛入元免雌
去往朱鳶豈如鴛鴦相逐俱棲俱宿勝林鳥之同心邁

池魚之比目朝浮兮浪華夜集兮江沙萍隨流而傅岼
網因風而綴花見虹梁之春色復相鳴而戢翼蘭渚兮
相依同盛兮同衰魂上相思之樹文生新市之機金雞
玉鵲不成羣紫鶴紅雉一生分願學鴛鴦鳥連翩恒逐
君

蕩婦秋思賦

蕩子之別十年倡婦之居自憐登樓一望惟見遠樹含
烟平原如此不知道路幾千天與水兮相逼山與雲兮

共色山則蒼蒼入漢水則涓涓不測誰復堪見鳥飛悲
鳴雙翼秋何月而不清月何秋而不明況乃倡樓蕩婦
對此傷情于時露萎庭蕙霜封階砌坐視帶長轉看腰
細重以秋水文波秋雲似羅日黯黯而將暮風騷騷而
渡河妾怨迴文之錦君思出塞之歌相思相望路遠如
何鬢飄蓬而漸亂心懷愁而轉歎愁縈翠眉斂啼多紅
粉漫已矣哉秋風起兮秋葉飛春花落兮春日暉春日
遲遲猶可至客子行行終不歸

詔

即位詔

夫樹之以君司牧黔首帝堯之心豈貴黃屋誠弗獲已而臨蒞之朕皇祖太祖文皇帝積德岐梁化行江漢道應在田具瞻斯屬皇考高祖武皇帝明竝日月功格區宇應天從民惟睿作聖太宗簡文皇帝地侔啓誦方符文景羯寇憑凌時難孔棘朕大拯橫流克復宗社羣公卿士百辟庶僚咸以皇靈睠命歸運斯及天命不可以

久淹宸極不可以久曠粵若前載憲章令範畏天之威
算隆寶厯用集神器于予一人昔虞夏商周年無嘉號
漢魏晉宋因循以久朕雖云撥亂且非創業思得上繫
宗祧下惠億兆可改太清六年為承聖元年逋租宿責
並許弘貸孝子義孫可悉賜爵長徒鑠士特加原宥禁
錮奪勞一皆曠蕩

蠲免力田詔

食乃民天農為治本垂之千載貽諸百王莫不敬授民

時躬耕帝藉是以稼穡為寶周頌嘉其樂章禾麥不成
魯史書其方冊秦人有農力之科漢氏開屯田之利頃
歲屯否多難薦臻干戈不戢我則未暇廣田之令無聞
于郡國載師之職有陋于官方今元惡殄殲海內方一
其大庇黔首庶拯橫流一厘曠務勞心日仄一夫廢業
舄鹵無遺國富刑清家給民足其力田之身在所蠲免
外既宣勒稱朕意焉

次建業詔

夫爰始居毫不廢先王之都受命于周無改舊邦之頌
頃戎旃既息闕柝無警去魯興嘆有感宵分過沛殞涕
實勞夕寐仍以瀟湘作亂庸蜀阻兵命將授律指期克
定今八表又清四郊無壘宜從青蓋之典言歸白水之
鄉江湘委輸方船連舳巴峽舟艦精甲百萬先次建業
行實京師然後六軍遄征九旂揚旆拜謁瑩陵修復宗
社主者詳依舊典以時宣力

謚王僉詔

賢而不伐曰恭謚恭子

詔贈杜崱

崱京兆舊姓元凱苗裔家傳學業世載忠貞自驅傳江
渚政號廉能推轂淺源寔聞清靜奄致殞喪惻愴于懷
可贈車騎將軍加鼓吹一部諡曰武

詔封王僧辯

贊俊遂賢稱于秦典自上安下聞之漢制所以仰協台
曜俯佐弘圖使持節侍中司徒尚書令都督揚南徐東

揚三州諸軍事鎮衛將軍揚州刺史永寧郡開國公僧
辯器宇凝深風格詳遠行為士則言表身文學貫九流
武該七略頃歲征討自西徂東師不疲勞民無怨讟王
業艱難實兼夷險宜其燮此中台膺茲上將寄之經野
匡我朝猷加太尉車騎大將軍餘悉如故

詔褒庾詵與劉之遴

荆南信多君子雖美歸田鳳清屬桓階賞德標奇未過
此子

令

答勸進羣下令

大寶二年太宗崩王僧辯
累表勸即尊位世祖答讓

孤以不德天降之災枕戈飲膽扣心泣血風樹之酷萬
始不追霜露之哀百憂總萃甫聞伯升之禍彌切仲謀
之悲若封豕既殲長蛇即戮方欲追延陵之逸軌繼子
臧之高讓豈知秋亭之壇安事繁陽之石侯景項籍也
蕭棟殷辛也赤泉未賞劉邦尚曰漢王白旗弗懸周發

猶稱太子飛龍之位孰謂可躋附鳳之徒既聞來議羣公卿士其諭孤之志無忽

復答

省示復具一二孤聞天生蒸民而樹之以君所以對揚天休司牧黔首攝提合維以前栗陸驪連之外書契不傳無得稱也自阪泉彰其武功丹陵表其文德有人民焉有社稷焉或歌謠所歸或惟天所相孤遭家多難大恥未雪國賊則蚩尤弗剪同姓則有扈不賓卧而思之

坐以待旦何以應寶歷何以嗣龍圖庶一戎既定罪人
斯得祀夏配天方申來議也

又答王僧辯等

大寶三年二月王僧辯衆軍發自尋陽世祖
馳檄告四方及僧辯等平侯景傳其首於江
陵又奉表勸即
尊位世祖答之

省表復具一二羣公卿士億兆夷人咸以皇天睠命歸
運所屬用集寶位于予一人文叔金吾之官事均往願
孟德征西之位且符前說今淮海長鯨雖云授首襄陽

短狐未全革面太平玉燭爾乃議之

答南平王恪等令

數鍾陽九時惟百六鯨鯢未剪寤寐痛心周粵天官秦
稱相國東至于海西至于河南次朱鳶北漸玄塞率茲
小宰弘斯大德將何用繼蹤曲阜擬跡桓文終建一匡
肅其五拜雖義屬隨時事無虛紀傳稱皆讓象著鳴謙
瞻言前典再懷哽噎

解嚴令

軍容不入國國容不入軍雖子產獻捷戎服從事亞夫
弗拜義止將兵今凶醜殲夷逆徒殄潰九有既截四海
乂安漢官威儀方陳盛禮衛多君子寄是式瞻便可解
嚴以時宣勒

課耕令

軍國多虞戎旃未靜青領雖熾黔首宜安時惟星鳥表
年祥于東秩春紀宿龍歌歲取于南畷況三農務業尚
看天桃敷水四民有令猶及落杏飛花化俗移風常在

所急勸耕且戰彌須自許豈直燕垂寒谷積黍自溫寧
可墮此玄苗坐餐紅粒不植鶯領空候蟬鳴可悉深耕
既種安堵復業無棄民力竝分地利班勒州郡咸使遵
承

下四方令

大壯承乾明夷垂翼璿度亟移玉律屢徙四岳頻遣勸
進九棘比者表聞譙沛未復瑩陵永遠于居于處寤寐
疚懷何心何顏撫茲歸運自今表奏所由竝斷若有啓

疏可寫此令施行

赦餘黨令

君子赦過著在周經聖人解網聞之湯令自獫狁孔熾
長蛇薦食赤縣阡危黔黎塗炭終宵不寐志在雪恥元
惡稽誅本屬侯景王偉是其心膂周石珍負背恩義今
竝烹諸鼎鑊肆之市朝但比屯邐寇擾為歲已積衣冠
舊貴被逼偷生勇士勲豪和光苟免凡諸惡侶諒非一
族令特闡以王澤削以刑書自太清六年五月三十日

味爽以前咸使惟新

勅

勅報司徒王僧辯

僧辯先下避書引孔奐為左西曹掾除丹陽
左丞元帝於荊州即位徵奐及沈炯僧辯累
表請留帝
手勅報之

孔沈二士今且借公

別勅王僧辯

承聖三年十月西魏相宇文黑泰遣兵及岳
陽王象合五萬將襲江陵世祖遣主書李膺

徵僧辯於建康為大都督荊州刺史別勅僧辯

黑秦背盟忽使舉斧國家猛將多在下流荆陝之衆悉非勁勇公宜率貔虎星夜就路倍道兼行赴倒懸也

勅杜龕

顏晃字元明瑯琊臨沂人承聖初為中書侍郎龕為吳興太守專好勇力其所部多輕險少年世祖患之乃使晃管其書翰仍勅龕

卿年時尚少習讀未晚顏晃文學之士使相毗佐造次之間必宜諮稟

教

召學生教

閣下昔楚王好詩沛王傳易猶且傳之不朽以為盛事
況吾親承天旨聞禮聞詩方欲化行南國被于西楚
表

薦鮑幾表

臣聞思皇多士仄陋所以明敎疇咨熙載髦俊所以竝
作斯固殷殿初基拾龍淵之寶虞祠始構獻鳳管之玉

旌蒲出魯賁帛歸齊頌聲既興盛業斯在伏惟陛下則
天緯地乘正馭才沙汰八風澄明六合叶龜登夢之客
日賁於丘園韋轂投釣之臣相望於魏闕故以物無遺
寶矣振鷺有充庭之謳白駒罕空谷之詠洋洋濟濟無
得而稱者焉臣誠愧知才識職非選舉竊以進賢上賞
蔽賢顯戮敢緣斯義用舉所知伏見鮑幾門庭雍睦立
身貞退博涉文史頗閑刀筆忠公抗直出宰廉平雅志
弘深安貧專靜解巾入士三十餘年自遊臣府一紀于

茲前宰東邑實有二魯之風近處南臺欲尊兩鮑之則
伏揆天嚴已當簡在脫蒙顯居良局登以清貫將齊毛
玠古人之服實同吳隱酌水之廉昔丁隈牧州陳顧翟
之好禮徐靖為郡薦袁渙之篤學桓範驅傳先舉管寧
朱則剖符亦稱董直臣才非往哲識愧前修輕塵聽覽
伏待斧鉞

請於州置學校表

臣聞公宮之南四術四教司樂成均六詩六律韶濩既

舞羽籥之道行焉黨塾茲備離經之志辯焉故不升嵩
霍豈識乾行之峻不臨溟渤安知地載之厚洎乎秦焚
金篆周亡玉鏡羣言爭亂諸子相騰書則夏侯歐陽易
則神翰道訓詩乃齊魯毛韓傳稱周左張夾禮有曲臺
王史之異樂有龍德趙定之殊伏維陛下撫五辰而建
五長播九德而道九州容成為厯興景雲之瑞伶倫吹
律應黃鍾之琯撥亂反正經武也制禮作樂緯文也若
非六經庖厨百家異饌三墳為瑚璉五典為笙簧豈能

暴以秋暘紆就望之景濯以江漢播垂天之澤

薦顧協表

臣聞貢玉之士歸之潤山論珠之人出於枯岸是以芻
蕘之言擇於廊廟者也臣府兼記室參軍吳郡顧協行
稱鄉閭學兼文武服膺道素雅量邃遠安貧守靜奉公
抗直傍闕知己志不自營年方六十家無妻子臣欲言
於官人申其屈滯協必苦執貞退立志難奪可謂東南
之遺寶矣伏維陛下未明求衣思賢如渴爰發明詔各

舉所知臣識非許郭雖無知人之鑒若守固無言懼貽蔽
賢之咎昔孔愉表韓續之才庾亮薦翟湯之德臣雖未
齒二臣協實無慙兩士

上忠臣傳表

資父事君寔曰嚴敬求忠出孝義兼臣子是以冬溫夏
清盡事君之節進思將美懷出奉之義義軒改物殷周
受命三能十亂九棘五臣靡不夙夜在公忠為令德若
使縉雲得姓之子姬昌魯衛之臣是知理合君親孝忠

一體性與率由因心致極臣連華霄漢憑暉日月三握
再吐夙奉紫庭之慈春詩秋禮早蒙丹宸之訓宣帝褒
德麟閣畫充國之形顯宗念功雲臺圖中華之像

遷荊州輸江州節表

周有掌節之職漢有符節之令所以子孫慷慨忠肅勤
劬無絕終古有高前載臣自擁麾鶴塞執茲龍節辛逮
銀山自溢玉燭調年雖免茂弘之譏竟微辛毗之勇

啓

東宮薦石門侯啓

竊以鳳鳴朝陽必資藍田之寶龍門點額亦俟堂溪之
珍是以紫玉見稱黃金為貴文傳夢鳥學重靈蛇點漆
凝脂事逾衛玠渾金璞玉才匹山濤昔翟陽隱逸見稱
庾亮陳平器局被薦無知以人廢言誠增竦聳進賢上
賞伏待慈照

慶東耕啓

伏惟陛下敬授民時造幄藉圃漢之元鳳未足捧羈晉

之太始非堪扶轂但承明侍從即事末由周南留滯伏
深戀仰

慶南郊啓

大裘而冕陶匏以質黃鍾既奏雲門斯舞樂諧六變歌
陳九德感天動神式展誠敬

謝東宮賜白牙鏤管筆啓

春坊漆管曲降深恩北宮象牙猥蒙霑逮雕鐫精巧似
遼東之仙物圖寫竒麗笑蜀郡之儒生故知稽賦非工

王銘未善昔伯喈致贈纔屬友人葛龔所酬止聞通識
豈若遠降鴻慈曲覃庸陋方覺瑠璃無當隋珠過侈但
有羨卜商無因則削徒懷曹植恒願執鞭

謝勅送齊王瑞像還啓

臣聞非晦非明法身凝寂有感有見渴仰赴幾伏惟陛
下百姓為心宜觀種覺十方皆見普照王畿將使化行
南國乃睠西顧江水安流大川利涉鮮雲變黶暫掩晨
離甘雨霏微猶藏宿霧高明可仰與天花而俱落清梵

騰空雜塤簷以相韻頂禮最勝敬謁法王瞻彼堵牆不足為喻立處針鋒弗云易擬臣身持淨戒心拈法流接足道周膜拜路左得未曾有喜躍充遍

上東宮古跡啓

師宜八分之巧元常三體之妙史籀李斯之篆梁鴻曹喜之書莫不總萃桂宮盈滿甲館竊以鸞驚之勢既聞之於索靖鷹跖之巧又顯之於蔡邕是以遊霧重雲傳敬禮之法鳥鴈魚鴈表揚泉之賦頗好六文多慙三禮

尚方大篆既其牢落柱下方書何曾仿佛空慕河間之
聚書竟微東平之獻表齊攸尺牘顧已缺然北海楷隸
終成難擬

謝上畫蒙勅褒賞啓

臣簿領餘暇竊愛丹青雲臺之像終微仿佛宣室之圖
更難擬議成蠅罕術畫馬疎文人非世將恩深晉帝之
賞跡愧景山寵踰魏皇之詔

謝東宮賚陸探微畫啓

工踰畫馬巧邁圖龍試映玉池即看魚動還傍金屏復
疑蠅集史遷暫覩懸識留侯之貌漢帝一瞻便見王嬙
之像

謝東宮賜彈棊局啓

繹本慙遊藝彌愧拂巾鳳峙鷹揚信難議擬鳥跂星懸
曾何彷彿蓮花未易玉屑不工緣邊之法庶遵細柳之
陣徘徊之勢方希明月之樓子桓有錫聞於邃古季緒
蒙賜即事可傳

謝敕賜第啓

竊以漢賜五倫寔云清吏魏寵衛臻用旌庸直未有靈
光輪奐睢陽爽塏北連城闕有似甄侯之舍東望市鄆
榮深豫章之圃昔狼望未平冠軍辭宅馬池猶隔雍丘
讓邸臣慙霍曹遠志但識君命無違再思庸陋九殞非
答

為妾夏王安豐謝東宮賚錦啓

舒將並石堪來暮雨榮持結纜剩可蕩舟秦川書字妙

能八體鄴縣登高真堪九日宋姬贈馬未足為榮馮媛
乘車方茲非寵

謝東宮賚辟邪子錦白褊等啓

江波可濯豈藉成都之水登高為豔取映鳳凰之文至
如鮮潔齊紈聲高趙縠色方藍浦光譬靈山試以照花
含銀燭之狀將持比月亂含璧之暉

謝東宮賚貂蟬啓

挹婁之_{毛毛}曲降鴻恩麗水之珍復蒙殊獎東平紫貂之

賜非聞暖額中山黃金之錫豈曰附蟬坐變仲尼之容
增暉允南之貌

謝勅賜褥啓

昔漢后錫貂魏君送褥未有元兔來王黃龍作貢便覺
肅脊非遙挹婁無遠

謝東宮賚寶枕啓

泰山之藥既使延齡長生之枕能令益壽黃金可化豈
直劉向之書陽燧含火方得葛洪之說况復重安玳瑁

獨勝瑰材方松非匹稱榴未擬

謝東宮賚花釵啓

蒞亂九衢花含四照田文之珥慙於寶葉王粲之詠慙
此乘蓮九官之璫豈直黃香之賦三珠之釵敢高崔瑗
之說況以麗玉澄暉遠過玳瑁之飾精金曜首高踐翡
翠之名

上穀充軍糧啓

臣聞金城千仞必資守粟革車千乘其在饋實願武車

綏旌列飛鴻之行陳奉辭受賁拚摯獸於羆虎賈逵渠
水雖曰難蹤梁習勸農竊知自勉

謝東宮賚瓜啓

金榮始薦瓊蘂載珍味奪蔗漿甘踰石蜜

為妾弘夜姝謝東宮賚合心花釵啓

未得投壺先應含笑不因鸞鳳自能歌舞夜姝昔往陽
臺雖逢四照曾遊灃浦慣識九衢未有仍伐爵釵還勝
翠羽飾以南金裝茲麗玉修靡夫人本分章華之裏中

山孺子獨荷春宮之恩有志當熊無期投閣

謝晉安王賜馬啓

繹武媿仲都遂蒙大驪之錫儒謝春卿空頒名馬之賚
故以取方驎友自匹龍媒不待景公婉如齊畫無勞馬
援翻等漢銅豈有滅沒黑龍連翩白馬錢文見重津名
取貴相彼騏驥猶深戀主矧伊伏櫪彌結懷恩

謝東宮賚蒸栗牛啓

色以秘府之書毛類陳王之玉駢角未奇瑩蹄非貴

謝賚車螯蛤蜊啓

車螯味高食部名陳物志蛤蜊聲重前論見珍若士竝
東海波臣西王母藥雀文始化羽燕猶在體潤珠胎形
隨月減

謝東宮賚麈尾錦陂團扇等啓

揚雄口訥本貴談端田蚡貌寢終於麗飾始興之扇方
斯非擬鄴中之錦匹此為輕方願弘此仁風既動承華
之氣服茲懷袖復比文若之香

謝賜功德淨饌一頭啓

瑤器自滿金鼎流味漿含都蔗味資石蜜

又謝賚功德食一頭啓

天厨淨饌菴羅法果

書

與蕭諮議等書

蓋聞圓光七尺上映真珠之雲面門五色傍臨珊瑚之
地化為金案奪麗水之珍變同珂雪高玄霜之彩豈不

有機則感感而遂通有神則智智而必斷故碧玉之樓
升堂未易紫紺之殿入室為難必須五根之信以信為
首六度之檀以檀為上故能捨財從信去有即空率斯
而談良可知矣竊以瑞像放光倏將旬日蹈舞之深形
於寤寐抃躍之誠結於興寢稍覺十字之蒸嗤何曾之
饌五鼎之味笑主偃之辭龜羹麟脯空聞其說羊酪猩
脣曷足云也困于酒食未若過中不餐螺蚶登俎豈及
春蔬為淨欲吾于三日潔齊自寅至戌一中而已自有

米如玉銳鹽類虎形雲夢之芹遼東之藻十斤之梨千
樹之橘青筍紫薑固栗霜棗適口充腸無索弗獲八功
德水竝入法流四土俱至偕讓弘道同志為友豈不盛
歟

荅廣信侯書

王白仰承比往開善聽講涅槃縱賞山中游心人外青
松白霧處處可悅竒峰怪石極目忘歸加以法水晨流
天華夜落往而忘返有會昔言王率物從務無由獨往

仰此高蹤寸心如結

荅齊國雙馬書

名重桂條形圖柳谷襄陽地穴近求未易滇池水裏遠
訪猶難價匹龍媒聲齊驥子河精曜采似伏波之鑄銅
震象飛文笑東瀛之刻玉加以控斯銀勒利此金銜鞍
揭鏤衢光含兩月纏縈紫縷色麗雙絲方嗤晉后恒乘
鄭國之駟更鄙曹君經餉蜀王之馬

又荅齊國雙馬書

於戲馬之為用遠矣大矣斯所以乾為脊馬震為鼻足
有是哉有是哉何則泮渙而馳可以及日躊躇而蹠可
以追風赤兔之騰聲的盧之濟主陳王有炤羈之說班
生有韁絆之談抑聞斯美遠勞此費懷哉懷哉老生不
云乎雖有拱壁以先駟馬良用此道中心藏之何日忘
之

與學生書

吾聞斲玉為器喻乎知道惟山出泉譬乎從學是以執

射執御雖聖猶然為弓為箕不無以矣抑又聞曰漢人
流麥晉人聚螢安有挾冊讀書不覺風雨以至朗月章
奏不知爝火為微所以然者良有以夫可久可大莫過
乎學求之於己道在則遵

答晉安王敘南康簡王薨書

南康兄器宇冲貴風神英挺魏之中山徒聞退讓晉之
扶風雖號師範用今方昔若吞雲夢及尋陽私疾孝感
神明殆不勝喪扶而後起猶冀天道可期豈謂福善虛

說且分違易久嘉會難逢綢繆宮閫不過紈綺之事離
羣作鎮動迴星紀之歷志異雙鸞之集遽切四鳥之悲
松茂柏書夙昔歡抃芝焚蕙歎今用嗚咽

答劉縮求述制旨義書

學山學海未臻其極為龍為光或從王事所賴昔經陝
服頗足良書憑几據梧靜供遊目枕中之記即用為枕
帷前之帙仍可為帷對此自娛敬而待命叩而必應已
謝懸鏡汲而無竭復乖井養

與蕭挹書

潤別清顏忽然已久未復音信勞望情深暑氣方隆恒
保清善握蘭雲閣解紱龍樓允膺妙選良為幸甚想同
僚多士方駕連曹雅步南宮容與自玩士衡已後唯在
茲日唯昆與季文藻相暉二陸三張豈獨擅美比暇日
無事時復含毫頗有賦詩別當相簡但衡巫峻極漢水
悠長何時把袂共披心腹

與武陵王書

蜀中斗絕易動難安弟可鎮之我自當滅賊

又

地擬孫劉各安境界情深魯衛書信恒通

與魏書

武陵王紀帥兵東下梁主繹甚懼與魏書字
文奉曰取蜀制梁在茲一舉遣尉遲迴自散
關伐蜀下之

子糾親也請君討之

與劉孝綽書

孝綽為廷尉正攜妾入府被劾免官時世祖為湘東王出鎮荊州與孝綽書孝綽答之

君屏居多暇差得肆意典墳吟詠情性比復希數古人
不以委約而能不技癢且虞卿史遷由斯而作想摛屬
之興益當不少洛地紙貴京師名動彼此一時何其盛
也近在道務閒微得點翰雖無紀行之作頗有懷舊之
篇至此已來衆諸屑役小生之詆恐取辱於廬江遮道
之姦慮興謀於從事方且褰帷自厲求瘼不休筆墨之
功曾何暇豫至於心乎愛矣未嘗有歇思樂惠音清風

靡聞譬夫夢想溫玉飢渴明珠雖愧卞隨猶為好事新
有所製想能示之勿等清慮徒虛其請無由賞悉遣此
代懷數路計行遲還芳札

與劉智藏書

菩薩蕭法車置郵大士劉智藏侍者自林宗遄反玄度
言歸以結元禮之心彌益真長之歎故以臨風望美對
月懷賢有勞寤寐無忘興寢方今玄冥在節歲聿云邁
日似青緹雲浮紅蘂清臺炭重北宮井溢想禪說為娛

稍符九次成誦之功轉探三密山間芳杜自有松竹之
娛巖穴鳴琴非無薜蘿之致修德之暇差足樂也昔韓
梅兩福求羊二仲鄭林騰名於馮翊周黨傳芳於太原
或有百鎰可捐千金非貴松子為餐蒲根是服未有高
蹈真儒歸宗法海梵王四鶴集林籟而相鳴帝釋千馬
經丘園而跼步有一於此猶或稱奇兼而總之何其盛
也故知南臨之水已類呂梁之川北眺之山彌同武安
之嶺豈復還思潏浦尚想彊臺睠彼漢池載懷荒谷以

此相求心可知矣僕久厭塵邦本懷人外加以服膺常
住諷味了因彌用思齊每增求友常欲登却月之嶺蔭
偃蓋之松挹璇玉之源解蓮華之劍藩維有限脫屣無
由每坐旬詡之牀恒思管寧之榻夢匡山而太息想桓
亭而延佇白雲間之蒼江不極未因抵掌我勞如何想
無金玉數在郵示弱水難航猶致書於青鳥流川弗遠
佇芳音於赤玉鶴望還信以代萱蘇得志忘言此寧多
述法車叩頭叩頭

與武陵王書

皇帝敬問假黃鉞太尉武陵王自九黎侵軼三苗寇擾
天常喪亂獯醜憑陵虔劉象魏黍離王室朕枕戈東下
泣血西浮殞愛子於二方無諸侯之八百身被屬甲手
貫流矢俄而風樹之酷萬恨始纏霜露之悲百憂繼集
扣心飲膽志不圖全直以宗社綴旒鯨鯢未剪嘗膽待
旦龔行天討獨運四聰坐揮八柄雖復結壇待將褰帷
納士拒赤壁之兵無謀於魯肅燒烏巢之米不訪於荀

攸才智將殫金貝殆竭傍無寸助險阻備嘗遂得斬長
狄於駒門挫蚩尤於楓木怨恥既雪天下無塵經營四
方專資一力方與岳牧同茲清靜隆暑炎赫弟比如何
文武具僚當有勞弊今遣散騎常侍光州刺史鄭安忠
指宣往懷

又與武陵王書

甚苦大智季月煩暑流金鑠石聚蚊成雷封狐千里以
茲玉體辛苦行陣乃眷西顧我勞如何自獯醜憑陵羯

胡叛渙吾年為一日之長屬有平亂之功膺此樂推事
歸當璧儻遣使乎良所遲也如曰不然於此投筆友于
兄弟分形共氣兄肥弟瘦無復相見之期讓棗推梨永
罷歡愉之日上林靜拱聞四鳥之哀鳴宣室披圖嗟萬
始之長逝心乎愛矣書不盡言

與鮑泉

面如冠玉還疑木偶鬚似蝟毛徒勞繞喙

與劉璠

鄧禹文學尚或執戈葛洪書生且云破賊前修無遠屬
望良深

報顏之儀獻神州公

枚乘二葉俱得游梁應貞兩世竝稱文學我求才子鯁
慰良深

遺周弘直書

適有都信賢兄博士平安但京師縉紳無不附逆王克
己為家臣陸緬身充卒伍唯有周生確乎不拔言及西

軍潺湲掩淚恒思吾至如望歲焉松柏後凋一人而已

與周弘正書

獯醜逆亂寒暑亟離海內相識零落略盡韓非之智不
免秦獄劉歆之學猶弊亡新音塵不嗣每以耿灼常欲
訪山東而尋子雲間西關而求伯起遇有今信方附相
聞遲比來啣慰其延佇

荅王僧辯書

昔文康獻橘十有二子用今方古彼有慙色今景之兇

惡既稔凱歌之聲已及嘉瑞遠臻但增鯁慰

下荊州

處士河東韓懷明南平韓望南郡庾承先河東郭麻竝
脫落風塵高蹈其事兩韓之孝友純深庾郭之形骸枯
槁或橡飯菁羹惟日不足或葭牆艾席樂在其中昔伯
武貞堅就仕河內史雲孤邵屈志陳留豈曰塲苗實惟
攻玉可加引辟并遣喻意既同魏侯致禮之請庶無辟
疆三緘之歎

遺王僧辯書

僧辯等討侯景軍至巴陵聞郢州陷因留戍之湘東王繹遺僧辯書

賊既乘勝必將西下不勞遠擊但守巴丘以逸待勞無慮不克

與王僧辯帛書

西魏兵伐江陵于謹令築長圍中外信命始絕元帝裂帛為書趣王僧辯入援

吾忍死待公可以至矣

檄

討侯景檄

夫剝極生災乃及龍戰師貞終吉方制殲豕豈不以侵陽蕩薄源之者亂階定龕艱難成之者忠義故羿澆滅于前莽卓誅于後是故使桓文之勲復興于周代溫陶之績彌盛于金行粵若梁興五十餘載平一寓內德惠悠長仁育蒼生義征不服左伊右瀍咸皆仰化濁涇清渭靡不向風建翠鳳之旗則六龍驤首擊靈鼉之鼓則百神驚肅風牧方邵之賢衛霍辛趙之將羽林黃頭之

士虎賁緹綺之夫叱咤則風雲興起鼓動則嵩華倒拔
自桐柏以北孤竹以南碣石之前流沙之後延頸舉踵
交臂屈膝胡人不敢牧馬秦士不敢彎弓協和萬邦平
章百姓十堯九舜曷足云也賊臣侯景匈奴叛臣鳴鏑
餘噍懸瓠空城本非國寶壽春畿要賞不踰月開海陵
之倉賑常平之米檄九府之費錫三官之錢冒干貨賄
不知紀極敢興逆亂梗我王畿賊臣正德阻兵安忍日
者結怨江竿遠適單于簡牘屢彰彭生之魂未弭聚斂

無度景卿之誚已及為虎傅翼遠相招致虔劉我生民
離散我兄弟我是以董率羣貌躬擐甲冑霜戈照日則
晨離奪暉龍騎蔽野則平原掩色信與江水同流氣與
寒風俱憤兇醜畏威委命下吏乞活淮肥苟存徐克渙
汗既行絲淪爰被我是以班師凱歸休牛息馬賊猶不
悛遂復矢流王屋兵躔象魏總章之觀非復聽訟之堂
甘泉之宮永乖避暑之地坐召憲司臥制朝宰矯託天
命偽作符書重增賦斂肆意哀剝生者逃竄死者暴尸

道路以目庶僚鉗口刑戮失衷爵賞由心老弱波流士
女塗炭臧獲之人五宗及賞縉紳之士三族見誅穀粟
騰踴自相吞噬懔懔黔首路有銜索之哀蠢蠢黎民家
有隕山之泣偃師南望無復儲胥露寒河陽北臨或有
穹廬擅帳南山之竹未足言其愆西山之兔不足書其
罪外監陳瑩之至伏承先帝登遐宮車晏駕奉諱驚號
五內摧裂州寃本毒無地容身景阻飢既甚民且狼顧
遂侵軼我彭蠡憑凌我郢邑竊據我江夏掩襲我巴丘

我是以義勇爭先忠貞盡力斬馘兇渠不可稱箕沙同
赤岸水若降河任約泥首于安南化仁面縛于漢口子
仙乞活于鄢郢希榮敗績於柴桑侯景奔竄十鼠爭穴
郭默清夷晉熙附義計窮力屈反殺後主畢原鄴郚竝
離禍患凡蔣邢茅皆伏鉄鑕是可忍也孰不可容幕府
據有上流實為分陝投袂荷戈志在畢命昔周依晉鄭
漢有虛牟彼惟末屬猶能如此況聯華日月天下不賤
為臣為子兼國兼家者哉咸以義旗既建宜須總一共

推幕府實用主盟粵以不佞謬董連率遠惟國艱不遑
寧處中權後勁龔行天罰提戈蒙險隕越以之天馬千
羣長戟百萬驅賁獲之士資智勇之力大楚踰荆山淺
源度彭蠡舳艫汎水以犄其南輜輶委輸以衝其北華
夷百濮羸糧影從雷震風駭直指建業按劍而叱江水
為之倒流抽戈而揮皎日為之退舍方駕長驅百道俱
入夷山殄谷充原蔽野挾輶曳牛之侶拔距礮石之夫
騎則逐日追風弓則吟猿落雁捧崑崙而壓卵傾渤海

而灌莢如駟馬之載鴻毛若奔牛之觸魯縞以此衆戰
誰能禦之脫復蜂蠆若毒獸窮則鬪謂山蓋高則四郊
多壘謂地蓋遠則三千弗違如彼怒蛙譬諸鼯鼠豈費
萬鈞無勞百溢加以日臨黃道兵起絳宮三門既啓五
將咸發舉整整之旗掃亭亭之氣故以臨機密運非賊
所解奉義而誅何罪不服今遣使持節大都督征東將
軍開府儀同三司江州刺史尚書令長寧縣開國侯王
僧辯率衆十萬直掃金陵鳴鼓聒天撻金振地朱旗夕

建如赤城之霞起戈船夜動若滄海之奔流計其同惡
不盈一族君子在野小人比周荷校滅耳匪朝伊夕春
長狄之喉擊郅支之頸今司寇明罰鑕所誅止侯景
而已黎元何辜一無所問諸君或世樹忠貞身荷寵爵
羽儀鼎族書勲王府俛眉猾豎無由自效豈不下慙泉
壤上愧皇天失忠與義難以日立想誠南風迺暵西顧
因變立功轉禍為福有能縛侯景及送首者封萬戶開
國公絹布五萬匹有能率動義衆以應官軍保全城邑

不為賊用上賞方伯下賞剖符並裂山河以紆青紫昔
由余入秦禮同卿佐日磬降漢且珥金貂必有其才何
卹無位若執迷不返拒逆王師大軍一臨刑茲罔赦孟
諸焚燎芝艾俱盡宣房河決玉石同沈信賞之科有如
皎日黜陟之制事均白水檄布遠近咸使知聞

論

全德志論

物我俱忘無貶廊廟之器動寂同遣何累經綸之才雖

坐三槐不妨家有三徑但接五侯不妨門垂五柳使良園廣宅面水帶山饒甘泉而足花卉蓀筠簞而玩魚鳥九月肅霜時饗田畯三春捧繭乍酬蠶妾酌升酒而歌南山烹羔豚而擊西缶或出或處竝以全身為貴優之游之咸以忘懷自逸若此衆君子可謂得之矣

鄭衆論

漢世銜命匈奴困而不辱者二人而已子卿手持漢節臥伏冰霜仲師固無下拜隔絕水火況復風生稽落日

隱龍堆翰海飛沙皋蘭走雪豈不酸鼻痛心憶雒陽之
宮陞眉泣橫悲想長安之城闕直以為臣之道義不為
生事君之節生為義盡豈望拔幽泉出重仞經長樂抵
未央及還望塞亭來依候火傍觀上郡側眺雲中雖在
已之願自隆而於時之報未盡

議

高祖武皇帝謚議

臣聞翼善傳聖曰堯仁聖盛明曰舜受禪成功曰禹除

虐去殘曰湯謚者行之跡號者功之表雖賤不誅貴卑
不誅尊而彰乎名者盛德之嘉號也被於物者治定之
實錄也斯所以聲明煥乎鍾石昭晰備於絃管者焉伏
惟天縱欽明惟睿作聖功超三五聲踰七十仰之彌高
就之彌遠載潛載躍乃武乃文先是水運告終羣后改
屬乾維罔構地紐如崩祧紀阡危公卿盱食九牧有淪
胥之悲八表興橫流之歎乃凝威黑水表瑞丹陵雲合
景從表裏禔福受終文祖允恭克讓知黔首不可以無

歸蒼生不可以無主降汾陽之遠志不得已而臨之於
是類帝裡宗革命創制禘郊式展殷薦斯潔臨茲大寶
化與和氣俱宣扇此王風政與秋霜並肅言懸日月功
格區宇不以紫宸為貴不以黃屋為尊政謚刑措民殷
國阜虹旌式卷堡燧載清胥象相因環牯無曠天衢亨
泰王道升平南海候風東溟奉貢膏露凝枝慶雲觸石
山開蒼壁地出玄珪驃騎把鉞則休屠款塞太尉抗旌
則名王蹙角聲教所漸浹靈蛇之都威令所行通燭龍

之外開庠建序布護於成均正俗移風氛氲於司樂虛
納十亂引諒直之規廣闢四門弘招賢之德青衿知擊
壤之性黃髮恣鼓腹之歡加以鑽味微言研精至道文
終所牧之典史倚所讀之書無輟萬機日且千遍馳郁
郁之聲表乾乾之德允所謂皇哉日用而不知者矣方
且告成岱嶽鏤升平之玉簡昭事梁甫秘禮首之金繩
而文王明夷事侔往冊黃帝橋山痛深前典萬有淪傷
三辰掩曜人祗軫慕山海含悲慟切陟方哀深遏密煩

寃荼毒貫切心髓風樹不靜陟岵何期思所以欽若九
功仰稽七德

序

簡文帝法寶聯璧序

竊以觀乎天文日月所以貞麗觀乎人文藻火所以昭
發況復玉毫朗照出天人之表金牒空解生文章之外
雖境智冥焉言語斯絕詠歌作焉可略談矣粵乃書稱
湯誥篇陳夢說昔則王畿居亳今則帝業維揚功施天

下我之自出豈與姚墟石紐譙城溫縣御龍居夏唐杜
入周而已哉皇帝垂衣負宸辨方正位車書之所會同
南暨交趾風雲之所沾被西漸流沙武實止戈秉宜生
之劒樂彰治定減庖犧之瑟相兼二八知微知彰將稱
四七如狼如虎寧俟容成翠屋之遊廣成石室之會故
以宗心者忘相歸憑者常樂昔轉輪獲法南宮有金龍
之瑞梵天請道東朝開寶蓋之祥盡善盡美獨高皇代
古者所以出師入保冬羽秋籥實以周頌幼冲用資端

士漢盈末學取憑通議大傳之論孟侯小戴之談司業
山川珍異仰郊迎而可知帷幄後言藉墾田而求驗以
今方昔事則不然我副君業邁宣尼道高啓筮之作聲
超姬發寧假卞蘭之頌譬衡華之峻極如渤澥之波瀾
顯忠立孝行修言道博施尚仁動微成務智察舞雩爰
分封蟻爰初登仕明試以功德加三輔威行九流董師
虎據操鉞蟬冕津鄉沈濟物仰平分之恩沂岱邛岷民
思後來之政陳倉留反裘之化淮海高墨幘之聲威漸

黃支化行赤谷南通舜玉北平堯柳朝鮮航海夜郎歛
塞然後體道方震雨施雲行漢用戊申晉維庚午增暉
前曜獨擅元貞恩若春風惠如冬日履道為輿策賢成
駟降意韋編留神紺帙許商筭術王圍射譜南龜異說
東馳雜賦任良奕碁羨門式法箴興琴劍銘自盤盂無
不若指諸掌尋涇辯渭重以鳳艷風飛鸞文颺豎織者
入無倫大者含元氣韻調律呂藻震玄黃豈俟取讚彥
先詢聞雅主至於鹿苑深義龍宮奧說遠命學徒親登

講肆詞為憲章言成楷式往復王祭事軼魏儲酬荅蔡
謨道高晉兩似懸鐘之應響猶衢尊之待酌率邇者踵
武逖聽者風聲是使金堅閉法寶冥夕夢無懷不滅華
胥夜感自非建慧橋明智劔薰戒香沐定水何以空積
忽微塵賢劫而終現黍累迴幹蘊珠藏而方傳加以大
秦之籍非符八體康居之篆有異六爻二乘始闢譬馬
傳免一體同歸棄犀崇象潤業滋多見思平積本有凝
邈了正相因雖談假績不攝單影即此後心還蹤初焰

俱宗出倒蓮華起乎淤泥竝會集藏明珠曜於貧女性
相常空般若無五時之說不生煩惱湮繁為萬德之宗
無不酌其菁華撮其旨要採彼玳鱗拾茲翠羽潤珠隨
水抵玉崑山每至鶴關旦啓黃綺之儔朝集魚燈夕爛
陳吳之徒晚侍皆仰稟神規躬承睿旨爰錫嘉名謂之
聯璧聯含珠而可擬璧與日而俱升以今歲次攝提星
在監德百法明門於茲總備千金不刊獨高斯典合二
百二十卷號曰法寶聯璧雖玉杯繁露若傍蒹葭金臺

鑿楹似吞雲夢繹自伏櫪西河攝官南國十迴鳳瑄一
奉龍光筆削未勤徒榮卜商之序稽古盛則文慙安國
之製謹抄纂爵位陳諸左右

使持節平西將軍荊州刺史湘東王繹年二十七字世
誠

侍中國子祭酒南蘭陵蕭子顯年四十八字景暢
散騎常侍御史中丞彭城劉溉年五十八字茂灌

散騎常侍步兵校尉東宮侍南琅邪王修年四十二字

彥遠

吳郡太守前中庶子南琅邪王規年四十三字威明
都官尚書領右軍將軍彭城劉孺年五十五字孝穉
太府卿步兵校尉河南褚球年六十三字仲寶

中軍長史前中庶子陳郡謝僑年四十五字國美
中庶子彭城劉遵年四十七字孝陵

中庶子南琅邪王穉年四十五字孺通

宣城王友前僕東海徐喈年四十二字彥邕

前御史中丞河南褚濬年六十字士洋

北中郎長史南蘭陵太守陳郡袁君正年四十六字世忠

中散大夫金華宮家令吳郡陸襄年五十四字師卿

中散大夫瑯邪王藉年五十五字文海

新安太守前家令東海徐摛年六十四字士績

前尚書左丞沛國劉顯年五十三字嗣芳

中書侍郎南蘭陵蕭幾年四十四字德玄

雲麾長史尋陽太守前僕京兆韋稜年五十五字威直
前國子博士范陽張綰年四十三字孝卿

輕車長史南蘭陵蕭子範年四十九字景則

庶子吳郡陸罩年十八字洞元

庶子南蘭陵蕭瑱年四十字文啓

秘書丞前中舍人南瑯邪王許年二十五字幼仁

宣城王文學南瑯邪王訓年二十五字懷範

洗馬權兼太府卿彭城劉孝儀年四十九字子儀

洗馬陳郡謝禧年二十六字休度

中軍錄前洗馬彭城劉蘊年三十三字懷芬

前洗馬吳郡張孝總年四十二字孝總

南徐州治中南蘭陵蕭子開年四十四字景發

平西中錄事參軍典書通事舍人南郡庾肩年四十八

字子慎

北中記室參軍潁川庾仲容年五十七字仲容

宣惠記室參軍南蘭陵蕭滂年三十二字希傳

舍人南蘭陵蕭清年二十七字元專

宣惠主簿前舍人陳郡謝嘏年二十五字茂範

尚書都官郎陳郡殷勸年三十字弘善

安北兵參軍彭城劉孝威年三十九字孝威

前尚書殿中郎南蘭陵蕭愷年二十九字元才

內典碑銘集林序

夫法性空寂心行處斷感而遂通隨方引接故鵲園善
誘馬苑弘宣白林將謝青樹已列是宣金牒方寄銀身

自象教東流化行南國吳主至誠歷七霄而光曜晉王

畫像經五帝而彌新次道孝伯嘉賓玄度斯數子者亦
一代名人或修理止於伽藍或歸心盡於談論銘頌所
稱興公而已夫披文相質博約溫潤吾聞斯語未見其
人班固碩學尚云讚頌相似陸機鉤深猶聞碑賦如一
唯伯喈作銘林宗無媿德祖能誦元常善書一時之盛
莫得係踵況般若玄淵真如妙密觸言成累係境非真
金石何書銘頌誰闡然建塔紀功招提立寺或興造有

由或誓願所記故鐫之立石傳諸不朽亦有息心應供
是曰桑門或謂智囊或稱印手高座擅名預伊師之席
道林見重陪飛龍之座裁眉廬阜之賢鄴中宛鄧之哲
昭哉史冊可得而詳故碑文之興斯焉尚矣夫世代亟
改論文之理非一時事推移屬詞之體或異但繁則傷
弱率則恨省存華則失體從實則無味或引事雖博其
意猶同或新意雖奇無所倚約或首尾倫帖事似牽課
或闕復博涉體製不工能使艷而不華質而不野博而

不繁省而不率文而有質約而能潤事隨意轉理逐言
深所謂菁華無以間也予幼好雕虫長而彌篤遊心釋
典寓目詞林頃常搜聚有懷著述譬諸法海無讓波瀾
亦等須彌同歸一色故不擇高卑唯能是與倘未詳悉
隨而足之名為內典碑銘集林合三十卷庶將來君子
或裨觀見焉

職貢圖序

竊聞職方氏掌天下之圖四夷八蠻七閩九貉其所由

來久矣漢氏以來南羌旅距西域憑陵創金城開玉關

絕夜郎討日逐覩犀甲則建朱崖聞蒲萄則通大宛以

德懷遠異乎是哉皇帝君臨天下之四十載垂衣裳而

賴兆民坐巖廊而彰萬國梯山航海交臂屈膝占雲望

日重譯至焉自塞以西萬八千里路之狹者尺有六寸

高山尋雲深谷絕景雪無冬夏與白雲而共色冰無早

晚與素石而俱貞踰空桑而歷昆吾度青丘而跨丹穴

炎風弱水不革其心身熱頭痛不改其節故以明珠翠

羽之珍細而弗有龍文汗血之驥卻而不乘尼丘乃聖
猶有圖人之法晉帝君臨實聞樂賢之象甘泉寫闕氏
之形後宮玩單于之圖臣以不佞推轂上游夷歌成章
胡人遙集歛開蹶角沿沂荆門瞻其容貌訴其風俗如
有來朝京輦不涉漢南別如訪採以廣聞見名為貢職
圖云爾

忠臣傳序

夫天地之大德曰生聖人之大寶曰位因生所以盡孝

因位所以立忠事君事父資敬之理寧異為臣為子率由之道斯一忠為令德竊所景行且孝子烈女逸民咸有別傳至於忠臣曾無述製今將發篋陳書備加論討忠臣傳死節篇序

自非識君臣之大體鑒生死之弘分何以能滅七尺之軀殉一顧之感然平路康衢從容之道進危塗險徑忠貞之節興登平路者易為功涉險塗者難為力從容之用世不乏人忠貞之槩時難屢有

孝德傳序

夫天經地義聖人不加原始要終莫踰孝道能使甘泉
自滔鄰火不焚地出黃金天降神女感通之至良有可
稱

全德志序

老子言全德歸厚莊周云全德不刑呂覽稱全德之人
故以全德創其名也此志隆大夫為首伊人有學有辯
不夭不貧寶劒在前鼓瑟從後連環灸輶雍容卒歲馬

馬高車優遊宴喜既令公侯踞掌復使要荒蹶角入室
生光豈非盛矣若乃河宗九策事等神鈎陽雍雙璧理
歸玄感南陽樊重高閣連雲北海公沙門人成市咨此
八龍各傳一藝夾河兩郡家有萬石人生行樂止足為
先但使樽酒不空坐客恒滿寧與孟嘗問琴承睫淚下
中山聽樂悲不自禁同年而語也

丹陽尹傳序

傳曰大夫受郡漢書曰尹者正也及其用人實難授受

廣漢和顏接下子高自輔經術孫寶行嚴霜之誅袁安
留冬日之愛自二京板蕩五馬南渡固乃上燭天文下
應地理爾其地勢可得而言東以赤山為成皋南以長
淮為伊洛北以鍾山為華阜西以大江為黃河既變淮
海為神州亦即丹陽為京尹雖得人之盛頗愧前賢而
眄遇之深多用宰輔皇上受圖負宸寶厯惟新制禮以
告成功作樂以彰治定豈直四三皇六五帝孕夏陶周
而已哉若夫位以德敘德以位成每念忝蒞京河茲焉

四載以入安石之門思勤王之政坐真長之室想清談之風求瘼餘晨頗多暇景今綴采英賢為丹陽尹傳

懷舊志序

吾自北守琅臺東探禹穴觀濤廣陵面金湯之設險方舟宛委眺玉笥之干霄臨水登山命儔嘯侶中年承乏攝牧神州戚里英賢尚冠髦俊蔭真長之弱柳觀茂弘之舞鶴清酒繼進甘果徐行長安郡公為其延譽扶風長者刷其羽毛於是駐伏熊迴結駟命鄒湛召王祥顧

而言曰斯樂難長誠有之矣日月不居零露相半素車
白馬往矣不追春華秋實懷哉何已獨軫魂交情深宿
草故備書爵里陳懷舊焉

洞林序

蓋聞玄枵之野鬼方難測朱鳥之舍神道莫知而緹幔
曉披既辯黃鍾之氣靈臺夕望便知玉井之色復以談
乎天者雖絕名言之外存乎我者還居稱謂之中余幼
學星文多歷歲稔海中之書略皆尋究巫咸之說偏得

研求雖紫微迢遞如觀掌握青龍顯晦易乎窺覽羨門
五將亟經玩習韓終六王常所寶愛至如周王白雉之
筮殷人飛燕之卜著名聚雪非關地極之山卦有密雲
能擁西郊之氣爻通七聖世經三古山陽王氏真解談
玄河東郭生纔能射覆兼而兩之竊自許矣

廬山碑序

夫日月麗天皇穹所以貞觀川嶽帶地后土所以維寧
廬山者亦南國之德鎮雖林石異勢而雲霞共色長風

夜作則萬流俱響晨鼙曉吟則百嶺齊應東瞻洪井識
曳帛之在茲西望石梁見指寶之可拾誠復慕類易悲
山中難久攀蘿結桂多見淹留

忠臣傳諫諍篇序

富貴寵榮人所不能忘也刑戮流放人所不能甘也而
士有冒雷霆犯顏色吐一言終知自投鼎鑊取離刀鋸
而曾不避者其故何也蓋傷茫茫禹跡毀於一朝赫赫
宗周滅成禾黍何者百世之後王化漸頹欽若之信既

盡解網之仁已泯徒以繼體所及守器攸歸出則清警
傳路處則憑玉負宸事無暫舛意有必從所謂生於深
宮之中長於婦人之手未嘗知憂未嘗知懼況惑褒人
之巧笑迷陽阿之妙舞重之以割斲用之以逋逃亦有
傾天滅地汗宮瀦社之罪拔本塞源裂冠毀冕之釁於
是策名委質守死不二之臣以剛腸疾惡之心確乎貞
一之性不忍見霜露麋鹿棲於宮寢麥穗黍離被於宗
廟故漚血抽誠披胸見欵赴焦爛於危年甘滅亡於昔

日冀桐宮有返道之明望夷無不言之恨而九重懸遠
百雉嚴絕丹心莫亮白刃先指見之者掩目聞之者傷
心然後鳴條有不收之魂商郊至白旗之戮

揚州梁安寺碑序

竊以陽之有宗者莫擬於靈烏夜之有光者孰踰於陰
兔故以日門見羲和之色月殿望奔娥之象而合璧迢
遞文尺猶且莫量朗鏡悠遠積空之所不算復有紫鳳
青龍之水却月朝霞之山白珪玄璧錢瑤池之上銀闕

金宮出瀛州之下空臺四柱隨仙衣而俱颺寶漸三重
暎瑞園而涵影旃檀散馥無復圓覺之風地涌神龕皆
成多寶之塔

與張纘詩存序

簡憲之為人也不事王侯負才任氣見余則申旦達夕
不能已已懷夫之德何日忘之

贊

忠臣傳寄託篇贊

太真英挺投袂勤王伯猷蹈節身殞名揚嶷嶷景倩主
亡與亡嗟乎尚矣惟國之良

忠臣傳諫諍篇贊

子政鏗鏗誠存社稷朱雲折檻遂其婞直

忠臣傳執法篇贊

設官分職咸曰師師彼己之子邦之直司豺狼當路安
問狐狸昏明有世直道無時

孝德傳皇王篇贊

天子之孝曰聖與仁重瞳表德參漏通神皇矣高祖連
鑣舜禹天經地義重規沓矩道踰七十聲超三五

孝德傳天性篇序

生之育之長之畜之顧我復我答施何時欲報之德不
可方思涓塵之孝河海之慈廢書歎息泣下漣漣

職貢圖贊

北通元菟南漸朱鳶交河悠遠合浦迴遘茲海無際陰
山接天遐哉鳥穴永矣雞田

銘

漏刻銘

玉衡稱物金壺博施司南司火未符茲義帝曰欽哉納
隍斯譬實惟簡在窮神體智宮槐晚合月桂宵暉清臺
莫爽解谷胥依七分六日五祀三微事齊幽贊乃會通
幾碧海有乾絳川猶竭飛流五色涓涓靡絕龍首旁注
仙衣俯裂箭不停晷聲無暫輟用天之貞分地之平如
弦斯直如渭斯清

東宮後堂仙室山銘

太華削成本擅竒聲峰如雪委嶺若蓮生雲除紫蓋霞
通赤城金壇是錄玉記題名鳳依桐樹鶴聽琴聲殿接
南箕橋連北斗秋河從帶春禽銜綬朱鳥安牕青龍作
牖

香爐銘

蘇合氤氲非烟若雲時穠更薄乍聚還分火微難盡風
長易聞孰云道力慈悲所薰

梁安寺刹下銘

阿閣崑崙洞房窸窣似靈光之金扇類景福之銀鋪垂
琬琰之文璫飾琅玕之仙寶神童戾止亟連翩於威鳳
薩埵來遊屢徘徊於紺馬有識之所虔仰無著之所招
提觀慧樓而下拜望天街而興善辭曰塵沙無始造色
無先飛蛾不息縈蠶自纏篋蛇未斷藤鼠方緣苦流長
汎愛火仍燃髻珠孰曉懷寶詎宜挺茲靈覺時惟天仙
真藉表聖化乳稱權寶刹千道高翻四懸鳳樓含日龍

臺吐煙紫山翠羽紅水青蓮雪宮月殿晨暉夜圓宵長
梵響風遠鐘傳仙衣有拂靈刹無邊

碑

皇太子講學碑

皇太子游雷種德重離作兩業冠孟侯道高上嗣宮牆
累仞高山仰止承華之闈更似通德之門博望之園反
類華陰之市家丞庶子並入四科洗馬後車俱通六學
轉金路而下辟雍粹玉裕而經槐市詳其懸鏡高堂衢

樽待酌瞻後忽前博文約禮將使東極長男之宮不獨
銘於銀榜南皮太子之序豈徒擅於金碑

鍾山飛流寺碑

清楚夜聞風傳百常之觀寶鈴朝響聲揚千秋之宮同
符上隴望長安之城闕有類偃師瞻洛陽之臺殿瞰連
甍而如綺雜卉木而成帷銘曰

雲聚峰高風清鐘徹月如秋扇花疑春雪極目千里平
原迢遞

曠野寺碑

雲楣膠葛桂棟陰崇刻虬龍於洞房倒蓮花於綺井月
殿朗而相暉雪宮穆以華壯轆轤璇題虹梁生於暮雨
嶸嶸銀榜飛觀入乎雲中銘曰

圓璫旦輝方諸夜朗金盤曜色寶鈴成響

郢川晉安寺碑

鳳凰之嶺羊綿映色蓮花之洞照曜增暉山云黃鶴疑
鈞天之夜響城稱却月似輕雲之霄蔽銘曰

虹梁紫柱螭桷丹牆綺井飛棟華棖璧璫應龍若動威
鳳疑翔玉鳥霄潤金池夕光朱城却稅紫陌潛通暫柳
朝綠江暉暝紅落霞將暮鮮雲夕布峰下陽烏林生陰
兔分珮隔浦皇檣隱霧俱聽法鐘同觀寶聚

攝山栖霞寺碑

金池無底已通寶壑之側玉樹生風傍臨綵船之上七
重欄楯七寶蓮花通風承露含香映日銘曰

苔依翠屋樹隱丹楹澗浮山影山傳澗聲風來露歇日

度霞輕三灾不毀得一而貞

歸來寺碑

幡影颺於絳臺梵聲依於應塔三相不留蕭蠶終壞八
苦遐長燈蛾未已銘曰

鈴隨風振盤依露泣丹桂無枝朱楊自剪九苑萌枯三
昧葉卷疏樹搖落翻流清淺

南岳衡山九貞館碑

簫鼓騰空烟霞相接星辰奪采燈燭非明風牖雲梁千

門萬戶樓施九柱已同瀨鄉之地山帶五城復類玄州
之所玉版之經猶蘊金丹之處存焉上月臺而遺愛登
景雲而忘老欣然不知所以而然日暉石瓦東眺靈
壽之峰月蔭玉牀西瞻華蓋之嶺竹類黃金既葳蕤而
防露木似紅蓮且紛披而拂日杯傳九醞隱淪之車晨
至堂開四扇西楹之鐘夜響

青谿山館碑

原夫法象莫過於天地著明莫過於日月鼓之以雷電

潤之以風雨咸秩無文所以名山致祭峻極於天青谿
山者荆南之中岳也隱隱于霄亭亭無際雲蓋三層如
在帝臺之側桂林八樹非異景山之傍輕霞亘起影落
照於陽谿清風遠至響猿鳴於巫峽西臨百丈之穴南
帶千仞之水洪源湛淡長波縈復

隱居先生陶弘景碑

昔太和中
有許遠遊者乃雲霄之勝賓太虛之選客先生規同矩合實踵高步曩基先構即駕胥宇千尋危聳

憑牖以望奔星百拱高懸倚櫺而觀朝日飛流界道似
天漢之橫波觸石起雲若奇峰之出岫銘曰

肇彼冥默翻成協贊身託外臣心同有亂重道尊德爰
積叡衷顧懷紛射璽問遙通朱楊鬱起華構方崇靜臺
冠月經榭迎風嶠嶢高棟宵霽修櫳極望山川周觀京
陸碧嶂千嶺清流萬谷景落崖重烟生岫複

荊州長沙寺阿育王像碑

蓋聞璇璣玉衡穹昊所以紀物金版玉文淳精所以播

氣何則咸秩社首義盡於寰中鑄鼎馮翊未窮於系表
況復道冠萬靈理超千聖智周十地行圓四等變海成
蘇移山入芥針鋒廣說藕絲見道惠音八種面門五色
組鉢生華入青樓而吐曜金牀照采出紫殿而相輝纔
度蓮河即處天冠之寺始遊羅衛便居堅固之林斯蓋
俯應閭浮未臻常樂降情誘接豈窮妄相若乃鏡無引
汲智生淺深明同一體惑起十重七地初乃方稱變易
三達後心因窮智種然俱冥四德脫屣雙林示表金棺

現焚檀栳浩浩焉不可知已却望五津距青蓮之洞傍
臨三天帶明月之流

莊嚴寺僧旻法師碑

夫宏才妙物雲液之所降生獨振孤標倫類之所遠絕
是故隨光燭魏非折水之恒珍和璧入秦豈潤山之常
寶僧旻法師蓋天地之淳精宇宙之瓌器本姓孫氏有
吳開國大皇帝其先也法師道藹二儀德克四海含春
夏之生長抱日月之貞明辭旨清新置言閑遠千門萬

戶必臻其奧九部五時若指諸掌坦然夷易豁爾洞開
故緇素結轍華戎延道晨風之鬱北林龍魚之趣深澤
哲人云逝指南誰屬銘曰

永離百非聞之寂滅苟云未樹共歸今轍方墳結構伽
藍罷設朱火一潛青松長列

光宅寺大僧正法師碑

昂昂千里孰辨騏驎之蹤汪汪萬頃誰測波瀾之際望
之若披雲霧覩之如觀日月至乃耆年宿望蓄思構疑

懸鐘無盡短兵有倦猶若分旦望景履冰待日莫不傾
河注燭虛往實歸皇帝革命受圖補天紉地轉金輪於
忍土策紺馬於閭浮逸翮方超圖南輟軌豈直盡茲相
府署彼義年方當高步仙階永編金牒繁霜凝而旦委
松風淒而暮來悲馬鳴之不反望龍樹而心哀銘曰
澄月夜虧清風旦卷曾巒遠岸蒼江傍緬

玄圃牛渚磯碑

竊以增城九重僊林八樹未有船如鴈鶴時度宓妃橋

似牽牛能分織女丹鳳為羣紫柱成列清風韻響即代
僊歌桂影浮池仍為月浦壁月朝暉金樓啓扉畫船向
浦錦纜牽磯花飛拂袖荷香入衣山林朝市併覺忘歸
善覺寺碑

金盤上疏非求承露玉舄前臨寧資潤礎飛軒絳屏若
丹氣之為霞綺井綠泉如青雲之入呂寶繩交映無慙
紫紺之宮花臺照日有跡白林之地銘曰

聿遵勝業代彼天工四園枝翠八水池紅花疑鳳翼殿

若龍宮銀城映沼金鈴響風露臺含月珠幡拂空

荊州放生亭碑

魚從流水本在桃花之源龍處大林恒捻浮雲之路豈
謂陵陽垂釣失雲失水莊子懸竿吞鉤吞餌雖復元龜
夜夢終見取於宋王朱鷺晨飛尚張羅於漢后譬如黃
雀伺蟬不知隨彈應至青鸕逐兔詎識杠鼎方前北海
之食鸚鵡未始非人西王之使傳信誰云賤鳥故知魚
鳥一觀俱在好生欲使金牀之雁更反衡陽之侶雪山

之鹿不充食革之冥

墓誌

庾先生承先墓誌

悠哉掌庾興自陶唐伯舅居晉連鑣渭陽爰斯厥後世
挺珪璋乃登靈岳言遵洞府乃涉石山將從輕舉實惟
貞吉實惟退讓皎皎不羣超超高尚本同壽夭寧論得
喪諸方未遊佳城已望蓬生蔣徑釣罷磻谿櫓悲新壠
桃餘故蹊風翻嶺背月下松西揚名不朽高蹈夷齊

特進蕭琛墓誌銘

山東流水關西城市義府辭鋒風飛雲起游楚宦梁桂
馥蘭芳蓮花可賦迷迭成章學類五行書倅三篋已研
金匱兼深玉牒石詞既擬藥社茲同桃李成徑松柏為
叢天地長久永扇高風

中書令庾肩吾墓志銘

荆山萬重地產卞和之玉隋流千仞水出靈蛇之珠故
能脩茲屈景育斯唐宋掌庾命族世濟琳琅遂昌開國

蟬聯冠冕父易高尚其道肥遁貞吉關吏早逢夙表真
人之氣少微晚暎還彰隱士之星肩吾氣識淹通風神
間逸鐘鼓辭林笙簧文苑入為度支尚書任同北斗錫
韓稜之劔朝北南宮識鄭崇之履余以其為人也瑚璉
之器無慚垂棘杞梓之材有均廊廟故贈散騎常侍蓋
旌賢也

侍中新渝侯墓志銘

爰始降神誕茲初載方琮有燭圓珠無類義若聯環文

同藻繪三分竹使再從建旗朱帷自舉白鹿隨車武實
威邊文能懷遠年歌去速時謠來晚昔我往矣千駟連
輶今茲旋旆雙鴈隨舟山迴素旄水道丹旒寂寥原野
搖落徂秋

黃門侍郎劉孝綽墓志銘

蔡墨攸陳有草有苗梁荆世積或魏或秦積善餘慶時
推俊民孝乎惟孝其德有鄰曰風曰雅文章動神鶴開
阮瑀鵬翥楊循身茲惟屈扶搖未申人罔石火山有楸

椿佳城無曙寒野方春

散騎常侍裴子野墓志銘

幾原博聞裁為典墳比良班馬等麗卿雲薰蕕既別涇
渭以分聖皇御極欽賢盱顧儲后特聖降情文苑既匹
嚴朱復同徐阮如何不憖卜期不遠

太常卿陸倕墓誌銘

如金有鑛如竹有筠體二方擬知十可鄰兩升鳳詔三
侍龍樓南皮朝宴西園夜游詞峰颺豎逸氣雲浮日往

月來暑流寒襲東耀方遠北芒已及墜露曉團悲風暮
急

侍中吳平光侯墓誌銘

惟嶽降神表山甫之德敬如君所顯成季之徵潔靜精
微岐嶷天挺學兼義府談均理窟歷太子洗馬八人掌
籍為崇賢之領袖五日來朝冠承華之楷模遷豫章內
史法井鸞峰甘露歲下蕭崖鶴嶺連理成陰徵為太子
左衛率邁疾薨于道頗類陶基民號燕北取譬羊祜巷

哭荆南副軍早垂隆眄憫其石火瞻斯翠蓋忽變丹旒
方便桓侯石椁載銘盛夏滕令佳城式鐫韶濩

祭文

祭東耕文

三農九穀為政所先萬箱億庾是曰民天繫稱斲耜書
美厥田花開杏樹凍解新泉當使黍稷莫莫民翳胥樂
甘雨祈祈遂及我私我私之熟表裏禔福禔福中田歲
取十千是薦是褻登頌有年

釋奠祭孔子文

粵若宗師猗歟乃聖惟岳降神惟天所命上善如水至人若鏡

祭顏子文

欽哉體一亞彼至人乍分介石時知落鱗不先稱寶席上為珍致虛守靜曲巷安貧欽風味道其德有鄰

騷

秋風搖落

秋風起兮寒鴈歸寒蟬鳴兮秋草腓
萍青兮水澈葉落兮林稀翠為蓋
兮玳為席蘭為室兮金作扉水周兮
曲堂花交兮洞房樹參差兮密稍
紫荷紛披兮疏且黃雙飛兮翡翠
並泳兮鴛鴦神女雲兮初度雨班
妾扇兮始藏光且淹留兮日云暮
對華燭兮歡未央

樂府

長歌行

當壚擅旨酒一卮堪十千無勞蜀山鑄
扶授采金錢人

生行樂爾何處不留連
朝為洛生詠夕作據梧眠
忽茲忘物我優游得自然

授一作受

芳樹

芬芳君子樹交柯
御宿園桂影含秋色
桃花染春源落英逐風聚
輕香帶藥翻藜枝
臨北閣灌木隱南軒
交讓良宜重成蹊何用言

巫山高

巫山高不窮迥出荆門中
灘聲下濺石猿鳴上逐風
樹

雜山如畫林暗澗疑空無因謝神女一為出房櫳

關山月

朝望青波道夜上白登臺月中有桂樹流景自徘徊寒
沙逐風起春花向雪開夜長無與晤衣單誰為裁

一作犯

隴頭水

銜悲別隴頭關路漫悠悠故鄉迷遠近征人分去留沙
飛晚成幕海氣夜如樓欲識秦川處隴水向東流

折楊柳

巫山巫峽長垂柳復垂楊同心且同折故人懷故鄉山
似蓮花艷流如明月光寒夜猿聲徹遊子淚沾裳

洛陽道

洛陽開大道城北達城西青槐隨幔拂綠柳逐風低玉
珂鳴戰馬金爪鬪塲雞桑姜日行暮多逢秦氏妻

長安道

西接長楸道南望小平津飛甍臨綺翼輕軒影畫輪雕
鞍承赭汗槐路起紅塵燕姬雜趙女淹留重上春

紫騮馬

長安美少年金絡鐵連錢
宛轉青絲鞵照耀珊瑚鞭
依槐復依柳躑躅復隨前方
逐幽并去西北共聯翩

驄馬驅

朔方寒氣重胡關饒苦霧
白雪晝凝山黃雲夙埋樹
連翩行役子終朝征馬驅
試上金微山還看玉關路

劉生

任俠有劉生然諾重西京
扶風好驚坐長安恒借名
菊

花連夜飲竹葉解朝醒
結交李都尉遨遊佳麗城

飛來雙白鶴

紫蓋學仙成能令吳市傾
逐舞隨疎節聞琴應別聲
集田遙赴影隔霧近相鳴
時從洛浦渡飛向遼東城

班婕妤

婕妤初選入含媚向羅幃
何言飛燕寵青苔生玉墀
誰知同輦愛遂作裂紈詩
以茲自傷苦終無長信悲

半路谿

相逢半路溪隔溪猶不度望望判知是翩翩識行步摘
贈蘭澤芳欲表同心句先將動舊情恐君疑妾妬

採蓮曲

碧玉小家女來嫁汝南王蓮花亂臉色荷葉雜衣香因
持薦君子願襲芙蓉裳

吳趨行

水裏生葱翅池心恒欲飛蓮花逐牀返何時乘舸歸

燕歌行

燕趙佳人本自多遼東少婦學春歌黃龍戍北花如錦
元菟城中月似娥如何此時別夫婿金羈翠旣往交河
還聞入漢去燕營怨妾心中百恨生漫漫悠悠天未曉
遙遙夜夜聽嚴更自從異縣同心別偏恨同時成異節
橫波滿臉萬行啼翠眉漸斂千重結竝海連天合不開
那宜春日上春臺唯見遠舟如落葉復看遙舸似行盃
沙汀夜鶴嘯羈雌妾心無怨生別離翻嗟漢使音塵絕
空傷賤妾燕南垂

烏棲曲

沙棠作舫桂為檝
夜渡江南採蓮葉
復值西施新浣紗
共向江干眺月華

其二

月華似璧星如佩
流影澄明玉堂內
邯鄲九枝朝始成
金卮玉椀共君傾

其三

交龍成錦鬪鳳紋
芙蓉為帶石榴裙
日下城南兩相望

月沒參橫掩羅帳

其四

七彩隨珠九華玉
蛺蝶為歌明星曲
蘭房椒閣夜方開
那知步步香風逐

詩

登隄望

驅馬河隄上
非謂城隅遊
懷山殊未已
徒然勞九愁
旅泊依村樹
江槎擁戍樓
高岸翻成浦
曲港返通舟
棗野

良知歎瓠河今可傳願假宣尼術泗水却橫流

赴荊州泊三江口

涉江望行旅金鉦間彩旂水際含天色虹光入浪浮柳
條恒掃岸花氣盡薰舟叢林多故社單戍有危樓疊鼓
隨朱鷺長簫應紫騮蓮舟夾羽斨畫舸覆緹油榜歌殊
未息於此泛安流

藩難未靜述懷

玉節威雲夢金鉦韻渚宮霜戈臨塹白日羽映流紅單

醪結猛將芳餌引羣雄
箭擁淇園竹劍聚若耶銅
亟覩周王駿多逢鮑氏驄
謀出河南賈威寄隴西馮
谿雲連陣合却月半山空
樓前飄密柳井上落疎桐
差營逢霰雨立壘挂長虹

和劉尚書兼明堂齋宮

質明攝上宰詰旦乘輶軒
四圭邸蒼玉六變舞雲門
香浮鬱金酒烟繞鳳凰樽
昭晃交輝映珎珮自相喧
微風颺清管輕雨發陳根
新花臨御陌春色起天園
河間獻

樂語斯道愧能論

和劉尚書侍五明集

帝德洽區宇垂衣彰太平黃唐慚懋實子姒恧嘉聲治
家陳五禮功成奏六英汲引為宸鑒舟航動睿情法王
唯一法無生信不生因因從此見果果自斯明元良仰
副后含一震鴻名龜藏踰啓筮魯史冠春卿日宮佳氣
滿月殿善風清綺錢蔽西觀緹幔卷南榮金門練朝鼓
玉壺休夜更宮槐當曉合城烏侵曙鳴露光枝上動霞

影水中輕虛薄今何事徒知戀法城

和鮑常侍龍川館

珍臺接閑館迢遞山之旁多解三真術俱善四明方玉
題書仙篆金榜燭神光桂影侵檐進藤枝繞檻長苔衣
隨溜轉梅氣入風香

登顏園故閣

高樓三五夜流影入丹墀先時留上客夫壻美容姿粧
成理蟬鬢笑罷斂蛾眉衣香知步近釧動覺行遲如何

舞館樂翻見歌梁悲猶懸北窓幌未捲南軒帷寂寂空
郊暮非復少年時

代舊姬有怨

寧為萬里隔無作死生離那堪眼前見故愛逐新移未
展春花落遽被涼風吹怨黛舒還斂啼紅拭復垂誰能
巧為賦黃金妾不貲

夕出通波閣下觀妓

娥月漸成光燕姬戲小堂胡舞間齊閣鈴盤出步廊起

龍調節鼓却鳳點笙簧樹交臨舞席荷生夾妓航竹密
無分影花疎有異香提盃時笑語歡茲樂未央

去丹陽尹尹荊州

驂駕乘馬馬謁帝朝承明分符蒞閩越終然慚勵精

闕

又

副君垂獎眄仁慈穆且敦終朝陪北閣清夜侍西園降
貴深知已寧思食棖恩未嘗辭畫室誰忍去轅轅

闕

示吏民

闕里尚撫謙瀨鄉裁知足咨余再分陝少思宜寡欲霞
出浦流紅苔生岸泉綠方令江漢士變為鄒魯俗

後臨荊州

擁旄去京縣褰帷辭未央弱冠從王役從容遊豈張不
學胡威絹寧挂裴潛牀所冀方留犢行當息飲羊戲蝶
時飄粉風花乍落香高欄來蕙氣疎簾度晚光綺錢臨
仄宇阿閣繞長廊

別荊州吏民

玉節居分陝金貂總上流
麾軍時舉扇作賦且登樓
年光徧原隰春色滿汀洲
日華三翼舸風轉七星旂
何解青絲纜將移丹桂舟

宮殿名詩

林間花欲然竹徑露初圓
鬪雞東道上走馬北塲邊
合歡依暝卷蒲萄向日鮮
旗亭覓張放香車迎董賢
定隔天淵水相思夜不眠

縣名詩

長陵新市北鄭衛好容儀先過上蘭苑還牽高柳枝薄
妝宜入鏡舒花堪照池蒲洲涵水色椒壁雜風吹此時
方夜飲平臺傳羽卮

姓名詩

征人習水戰辛苦配戈船夜城隨偃月朝軍逐避年龍
吟澈水度虹光入夜圓濤來如陣起星上似烽然經時
事南越還復討朝鮮

將軍名詩

虎旅皆成陣，龍騎盡能誦。鳴鞭俱破虜，決勝往長榆。細柳浮輕暗，大樹繞栖烏。樓船寫退鷁，檣鳥狎飛鳬。度河還自許，偏與功名俱。

屋名詩

梁園氣色和斗酒，共相過玉柱。調新曲畫扇，掩餘歌深潭。影菱菜絕壁，挂輕蘿木蓮。恨花晚，薔薇嫌刺多。含情戲芳節，徐步待金波。

車名詩

長墟帶江轉連甍映日分佳人坐椒屋接膝對蘭薰繞
砌紫流水邊梁圖畫雲錦色懸殊衆衣香遙出羣日暮
輕帷下黃金妾贈君

船名詩

天際浮雲飛三翼自相追池模白鵠舞檐知青雀歸華
淵通轉塹伏檻跨相磯松澗流星影桂牕斜月暉思君
此無極高樓淚染衣

歌曲名詩

啼鳥怨別偶曙鳥憶離家石闕題書字金燈飄落花東
方曉星沒一作度西山晚日斜縠衫迴廣袖團扇掩輕紗
暫借青驄馬來送黃牛車

藥名詩

戍客恒山下常思衣錦歸況看春草歇還見鴈南飛蠟
燭凝花影重臺閉綺扉風吹竹葉袖綢繆流黃機詎信
金城裏繁露曉霑衣

鐵穴名詩

金椎五百里日晚唱歸來車轉承光殿步上通天臺
釵臨曲池影扇拂玉堂梅先取中庭入罷逐步廊迴下關
那早閉人迎已復開

龜兆名詩

土膏春氣生倡女協春情魚遊連北水鵠作遼東鳴折
梅還插鬢盪柱更移聲銀燭含朱火金鑪對寶笙百枝
凝夕燄却月隱高城

獸名詩

豹韜求秘術虎略選良臣
水涉黃牛浦山過白馬津
摧鋒上狐塞畫象入麒麟
果下新花落桃枝芳樹春
王孫及公子熊席復橫陳

鳥名詩

方舟去鳩鵲鵲引欲相要
晨鳬移去舸飛燕動歸橈
雞人憐夜刻鳳女念吹簫
雀釵照輕幌翠的繞纖腰
復聞朱鷺曲鉦管雜迴潮

樹名詩

桃李競追隨
輕衫露弱枝
杏梁始東照
柘火未西馳
香因玉釧動
佩逐金衣移
柳葉生眉上
珠璫搖鬢垂
逢君桂枝馬
車下覓親知

草名詩

胡王迎娉主
塗經薊北遊
金錢買含笑
銀缸影梳頭
初控游龍馬
仍移卷柏舟
中江離思切
蓬鬢不堪秋
況度菖蒲海
落月似懸鉤

相名詩

仙人賣玉杖乘鹿去山林浮杯度池曲摩鏡往河陰井
內書銅板竈裏化黃金妻搖五明扇妾弄一絃琴暫遊
忽千里中天那可尋

望江中月影

文苑英華作簡文帝今
從藝文初學作元帝

澄江涵皓月水影若浮天風來如可泛流急不成圓秦
鉤一作鏡斷復接和壁碎還聯裂紈依岸草斜掛逐行船
即此春江上無俟百枝然

詠霧

三晨生遠霧五里暗城闌從風疑細雨映日似游塵乍
若輕烟散時如佳氣新不妨鳴樹鳥時蔽摘花人

春日篇

春還春節美春日春風過春色日日異春情處處多處
處春芳動日日春禽變春意春已繁春人春不見不見
懷春人徒望春光新春愁春自結春結詎能申欲道春
園趣復憶春時人春人意何在空爽上春期獨念春花

落還以惜春時

納涼

高春斜日下佳氣滿欄楹池紅早花落水綠晚萍生星
稀月稍上雲開河尚橫白鳥翻帷暗丹螢入帳明朱棊
趨北閣玳席徙南榮金鋪掩夕扇玉壺傳夜聲

賦得涉江採芙蓉

江風當夏清桂楫逐流縈初疑京兆劍復似漢冠名荷
香帶風遠蓮影向根生葉卷珠難溜花舒紅易輕日暮

鳧舟滿歸來度錦城

賦得蘭澤多芳草

春蘭本無艷春澤最歲蕤
燕姬得夢罷尚書奏事歸
臨池影入浪從風香拂衣
當門已芳馥入室更芳菲
蘭生不擇逕十步豈難稀

詠石榴

塗林未應發春暮轉相催
然燈疑夜火連珠勝早梅
西域移根至南方釀酒來
葉翠如新剪花紅似故裁
還憶

河陽縣映水珊瑚開

看摘薔薇

倡女倦春閨迎風戲玉除近叢看影密隔樹望釵疎橫
枝斜綰袖嫩葉下牽裾牆高舉不及花新摘未舒莫疑
插鬢少分人猶有餘

賦得竹

嶰谷管新抽淇園節復修作龍還葛水為馬向并州柯
亭臨絕澗桃枝夾細流冠學芙蓉勢花堪威鳳游邛王

若有獻張騫應拜侯

從軍行 一作王僧辯從軍

寶劒飾龍烟長虹畫彩旃山虛和鏡管水靜瀉樓船連
雞隨火度燧象帶烽然洞庭曉風急瀟湘夜月圓荀令
多文藻臨戎賦雅篇

詠池中燭影

魚燈且滅燼鶴焰暫停輝自有銜龍燭青火入朱扉映
水疑三燭翻地類九微入林如燐影度渚若螢飛河低

扇月落霧上珠星稀章華終宴所飛蓋且相追

晚樓烏

日暮連翩翼俱向上林樓風多前鳥駛雲暗後羣迷路
遠聲難徹飛斜行未齊應從故鄉返幾過入蘭閨借問
倡樓妾何如蕩子妻

登江州百花亭懷荆楚

極目纔千里何由望楚津落花灑行路垂楊拂砌塵柳
絮飄春雪荷珠漾水銀試酌新豐酒遙勸陽臺人

汎蕪湖

桂潭連菊岸桃李映成蹊石文如濯錦雲飛似散珪橈
度菱根反船來荇葉低颿隨迎雨燕鼓逐伺潮雞

早發龍巢

征人喜放溜曉發晨陽隈初言前浦合定覺近洲開不
疑行舫動唯看遠樹來還瞻起漲岸稍隱陽雲臺

夜宿柏齋

獨暗行人靜簾開雲影入風細雨聲遲夜短更籌急能

下班姬淚復使倡樓泣況此客遊人中宵空佇立

落日射罷

促宴引枚鄒中園觀獸侯日度墉陰廣風橫旗影浮移
竿標入箭疊鼓送爭籌附枝時可息言從清夜遊

後園看騎馬

良馬出蘭池連翩驅桂枝鳴珂隨跼駛輕塵逐影移香
來知驟近汗斂覺風吹遙望黃金絡懸識幽并兒

春日 一作和劉上黃

新鶯隱葉轉新燕向牕飛柳絮時依酒梅花任入衣玉珂隨風度金鞍照日暉無令春色晚獨望行人歸

任一作乍

戲作艷詩

入堂值小婦出門逢故夫含辭未及吐絞袖且踟躕搖茲扇似月掩此淚如珠今懷固無已故情今有餘

和林下詠姬應令

和昭明

日斜下北閣高宴出南榮歌清隨澗響舞影向池生輕花亂粉色風篠雜絃聲獨念陽臺下願待洛川笙

閨怨

蕩子從遊宦，思妾守房櫳。
塵鏡朝朝掩，寒衾夜夜空。
若非新有悅，何事久西東。
知人相憶否，淚盡夢啼中。

祀伍相廟

石城寧足拒金陣，詎能追楚關。
開六塞吳兵入，九圍山水猶縈帶。
城池失是非，空餘壽宮在。
日暮舞靈衣。

詠風

樓上試朝妝，風花下砌傍。
入境先飄粉，翻衫好染香。
度

舞飛長袖傳歌共繞梁欲因吹少女還將拂大王

詠霧

曉霧晦階前垂珠帶葉邊五里浮長隰三辰晦遠天傍
通似佳氣却望若飛烟疎簾還復密新棟更疑連還思
逢樂廣能令雲霧褰

賦得蒲生我池中

池中種蒲葉葉影蔭池濱未好中宮薦行堪隱士輪為
書聊可截匹柳復宜春瑞葉生符苑鏤碧獻周人

詠陽雲樓簷柳

楊柳非花樹，依樓自覺春。
枝邊通粉色，隙裏映紅巾。
帶日交簾影，因吹掃牕塵。
拂簷應有意，偏宜桃李人。

五言詩

梁詞人麗句
云梁世宗作

寒浞猶稽命，新都久未平。
留滯淹三楚，巘岼保一城。
終當撫期運，伐罪吊蒼生。

晚景遊後園

高軒聊騁望，煥景入川梁。
波橫山渡影，雨罷葉生光。
日

移花色異風散水紋長

遊後園

暮春多淑氣斜景落高春日照池光淺雲歸山望濃入
林迷曲徑渡渚隔危峰

古意

妾在成都縣願作高唐雲樽中石榴酒機上蒲萄紋停
梭還斂色何時勸使君

雜詠二首

秋夜

秋夜九重空蕩子怨房櫳燈光入綺帷簾影穿屏風金徽調玉軫茲夜撫離鴻

寒閨

烏鵲夜南飛良人行未歸池水浮明月寒風送搗衣願織迴文錦因君寄武威

和彈箏人

橫箏在故帷忽憶上絃時舊柱離移處銀帶手輕持悔

道啼將別教成今日悲

其二

瓊柱動金絲秦聲發趙曲流徵含陽春美手過如玉

出江陵縣還

遊魚迎浪上雛雉向林飛遠村雲裏出遙船天際歸

其二

朝出屠羊縣夕反仲宣樓水滿還侵岸沙盡稍開流

詠歌

汗輕紅粉濕坐久翠眉愁傳聲入鐘磬餘轉雜瑩篴

贈到溉洽

梁書曰時以溉洽兄弟比之二陸故世祖贈詩曰

魏世重雙丁晉朝稱二陸何如今兩到復似凌寒竹

遺武陵王詩

回首望荆門驚浪且雷奔四鳥嗟長別三聲悲夜猿

別荊州吏目

寄言謝桀黠無乃氣干雲安知灞陵下復有李將軍

其二

莫言江漢遠烟霞隔數千何必黃丞相重應臨潁川

細雨

風輕不動葉雨細未霑衣入樓如霧上拂馬似塵飛

望春詩

葉濃知柳密花盡覺梅疎蘭生未可握蒲小不堪書

綠柳

長條垂拂地輕花上逐風露露疑染綠葉小未障空

詠梅

梅含今春樹還臨先日池人懷前歲意花發故年枝

宜男草

可愛宜男草垂采映倡家何時如此葉結實復含花

細草

依堦疑綠蘚傍渚若青苔漫生雖欲遍人跡會應開

賦得春荻

翠莢玉池前遙映江南蓮非秋無有眊未燒不生烟

詠螢火

著人疑不熱集草訝無烟到來燈下暗翻往雨中然

離合

沈寥雲物淨水木備春光龕定方無遠合浦不難航

後園作迴文詩

斜峰繞徑曲聳石帶山連花餘拂戲鳥樹密隱鳴蟬

賦登山馬

登山馬逕小逕小馬纔通汗赭疑霑勒衣香不逐風何

殊隴頭望遙識祁連東

古意詠燭

花中燭焰焰動簾風不見來人影迴光持向空

春別應令六首

昆明夜月光如練上林朝花色如霰朝花夜月動春心
誰恐相思不相見

其二

試看機上交龍錦還瞻庭裏合歡枝映日通風影珠幔

飄花拂葉度金池不聞離人當重合唯悲合罷會成離

其三

門前楊柳亂如絲直置佳人不自持適言新作裂紈詩
誰悟今成織素辭

其四

日暮徙倚渭橋西正見流月與雲齊若使月光無近遠
應照離人今夜啼

其五

別罷花枝不共攀
別後書信不相關
欲覓行人寄消息
依常潮水暝應還

其六

三月桃花合面脂
五月新油好煎澤
莫復臨時不寄人
漫道江中無估客

送西歸內人

秋氣蒼茫結孟津
復送巫山薦枕神
昔時慊慊應愁去
今日勞勞長別人

宴清言殿作柏梁體

玉衡七政轉璇璣帝升降端揆而才非

侍中尚書僕射臣裒

澄鏡

朱紫眇難追

吏部尚書臣穀

幽逼詩四首

南史曰元帝避建鄴而都江陵外迫強敵內失人和魏師至方徵兵四方未至而城見剋在幽逼求酒飲之製詩四絕後為梁王詒所害

南風且絕唱西陵最可悲今日還蒿里終非封禪時

其二

人生逢百六天道異貞恒何言異螻蟻一旦損鯤鵬


其三

松風侵曉哀霜霧當夜來寂寥千載後誰畏軒轅臺

其四

夜長無歲月安知秋與春原陵五樹杏空得動耕人

漢魏六朝百三家集卷八十四



總校官庶吉士 臣侍 朝

校對官檢討 臣王坦修

謄錄監生 臣王錫壽